

摘藻堂四庫全書薈要

集部

欽定四庫全書  
菴日要卷二萬二百八十

集部

宋詩鈔卷二十七

內閣中書舍人吳之振編

米黻襄陽集鈔

黻自云黻即芾也故亦作芾字元章太原人徙居襄陽號襄陽漫士後徙居吳以母侍宣仁后藩邸舊恩補臨光尉歷知雍丘縣連水軍使太常博士知無為軍名為書畫學博士賜對便殿上其子友仁楚江清

曉圖擢禮部員外郎出知淮陽軍卒解音律象緯善屬文作韻語要必已出為工務崖絕魁壘悟竹簡以竹聿行漆故篆籀法特古作字遒勁奇峭畫山水人物自成一家極江南煙雲變滅之趣晚以研山易北固園亭名海嶽庵淨名齋又作寶晉齋因號海嶽外史又以曾監中嶽廟號中嶽外史自稱家居道士有潔癖世謂水淫任太常奉祀太廟洗去祭服藻火坐是被黜冠服作唐人所好多違世異俗故人皆稱米

顛嘗作詩云飯白雲留子茶甘露有凡人叩之曰只  
是甘露哥哥耳王安石愛其詩摘書扇上東坡云元  
章奔逸絕塵之氣超妙入神之字清新絕俗之文相  
知二十年恨知公不盡答曰更有知不盡處其風致  
可想也有山林集十卷恨未見其全

垂虹亭

斷雲一葉洞庭飄玉破鱸魚霜破柑好作新詩寄桑苧  
垂虹秋色滿東南

題多景樓

欲雨氣不透庭梧有棲煙回首望北固雲藏淨名天呼  
童速具輿憑高覽山川隱見豈不好開霽景固全須與  
江風流湛湛清露圓歸途知有伴華月上丹淵

觀音巖

秦驅禹鑿已寥寥却為高人得姓焦鮑餌有時邀楚釣  
海雲常覺護山樵巖多陰霧龍藏角虹絳蒼林玉露臙  
濁氣不侵靈貺下方壇曾駐紫清飈

題泗濱南山石壁曰第一山

京洛風沙千里還  
船頭出汴翠屏間  
莫論衡霍撞星斗  
且是東風第一山

山光寺

竹園山徑晚風清  
又入山光寺裏行  
一一過僧談舊事  
遲遲繞壁認題名  
仙來石畔懷灰劫  
鶴語池邊勸後生  
三十年間成底事  
空叨薄祿是浮榮

望海樓

雲間鐵瓮近青天，縹緲飛樓百尺連。  
三峽江聲流筆底，六朝帆影落樽前。  
幾番畫角催紅日，無事滄洲起白煙。  
忽憶賞心何處是，春風秋月兩茫然。

題子敬范新婦唐摸帖

貞觀欵書丈二紙，不許兒奇專婦美。  
何為寥寥寶是似，遭亂歸貞火兼水。  
千年誰人能繼趾，不是名家殊未智。  
嗟爾方來眼次洗，玉躑金蹄羊歸米。

雲物龍蛇森動紙，父子王家真濟美。  
張翼小兒寧近似。

滄溟浩對蹄涔水騰蛇無足鼯多趾以假易真信用智  
龜辭雖多手屢洗卷不生毛誰似米

真裂紋

闕

紙跋印多時俗眼美誠懸尚復誤疑似

有渭不能辨涇水真為頭面拳跌趾久假中分辨愚智  
寶袖開時心一洗百氏何人傳至米

漢王宗漢作蘆鴈有佳思贈以詩

偃蹇汀眠鴈蕭梢風觸蘆京塵方滿眼速為喚花奴  
埜趣分苔水風光剪雪湖塵中不作惡為有鄴公圖



奮薛紹彭

世言米薛或薛米猶言弟兄與兄弟四海論年我不卑  
品定多知定如是

誄劉涇

唐滿書奩晉不收却緣自不信雙眸發狂為報豢龍子  
不怕人稱米薛劉

擬古

青松勁挺姿凌霄耻屈盤種種出枝葉牽連上松端秋

花起絳煙旖旎雲錦殷不羞不自立舒光射九九柏見  
吐子效鶴疑縮頸還青松本無華安得保歲寒

龜鶴年壽齊羽介所托殊種種是靈物相得忘形軀鶴  
有冲霄心龜厭曳尾居以竹兩附口相將上雲衢報汝  
慎勿語一語墮泥塗

秋登峴山之作

皎皎中天月團團徑千里震澤乃一水所占已過二娑  
羅即峴山謬云形大地地惟東吳偏山水古佳麗中有

皎皎人璫衣玉為珥位推列仙長學與千年對幽操久  
獨處迢迢願招類金颺帶秋威歛逐雲檣至朝隔輿馭  
颺暮過光浮袂雲育有風駐蟾餐有刀利亭亭太陰宮  
無乃瞻星氣興深夷險一理洞軒裳偽紛紛夸俗勞坦  
坦忘懷易浩浩將我行蠢蠢須公起

西山書院丹徒私居也上皇樵人以異石來告余  
凡八十一穴狀類泗淮山一品石加秀潤焉余  
因題為洞天一品石以麗其八十一數令百夫

輦致寶晉齋又七日甘露下其石梧桐柳竹椿  
杉蕉菊無不霑也自五月望至廿六日猶未已  
因思之作此詩

我思岳麓抱黃閣飛泉元在半天落石鯨吐出流一里  
赤日露下陰紛薄我曾坐石浸足眠肘項抵水洗背肩  
客時救我病欲死一夜轉筋著艾燃如今病渴擁爐坐  
安得縮腳三十年重往石上浸足眠

甘露寺

五代蕭蕭木葉稀樓高北固落殘暉兩州城郭青烟起  
千里江山白鷺飛海近雲濤驚夜夢天低月露濕秋衣  
使君肯負時平樂長倒金鍾盡醉歸

答劉巨濟

劉郎收畫蚤甚早折枝草草首徐熙十年之後始聞道  
取吾韓戴為神奇邇來白首進道與學者信有髓與皮  
始知十襲但遮壁牛馬便可裹敝帷叢叢太平老寺主  
白紗冒首無冠蕤武士後列肅大劔宮女傍侍顰脩眉

神清眸子知寡欲齒露脣反法定飢世人覩服似摩詰  
不知六朝居士衣後人勿把亂唐突梁時筆法了可知  
道子見之必再拜曹劉何物望藩籬本當第一品天下  
却緣顧筆在漣漪

潤州甘露寺

邑故重重構春歸戶戶嵐槎浮龍委骨畫失獸遺耽神  
護衛公塔天留米老庵栢梁終厭勝會副越人譚

雜詩

揚清歌發皓齒北方佳人東鄰子且吟白紵停綠水長  
袖拂面為君起寒雲夜卷霜海空朔風吹天飄塞鴻玉  
顏滿堂樂未終館娃日落歌吹濃絃歌興罷拂衣還棄  
米何嘗有俸錢恩自大鈞能逐物只應訪樂是優賢

寄薛郎中紹彭

老來書興獨未忘頗得薛老同徜徉天下有識誰鑒定  
龍宮無術療膏肓淮風吹戟稀訟牒典客閉閣閒壺漿  
吟樹對山風景聚墨池濯硯龜魚藏珠臺寶氣每貫月

月觀桂實時飄香銀淮燭天限織女烟海拈地生靈光  
雋兒乃是翰墨侶挾竹不使輿衛將象管鈿軸映瑞錦  
玉麟斐几鋪雲肪依依煙革動勃鬱矯矯龍蛇起混茫  
持此以為風月伴四時之樂渠未央部刺不糾翰墨病  
聖恩養在林泉鄉風沙漲天烏帽客胡不東來從此荒  
歐怪褚妍不自持猶能半蹈古人規公權醜怪惡札祖  
從茲古法蕩無遺張顛與柳頗同罪鼓吹俗子起亂離  
懷素獨獠小解事僅趨平淡如盲醫可憐智永硯空白



去本一步呈千喙已矣此生為此困有口能談手不隨  
誰云存心乃筆到天工自是秘精微二王之前有高古  
有志欲購無高貲殷勤分貽薛紹彭散金購取重跋題  
寄紹彭

蕭李駉子弟不收慰問帖妙迹固通神水火土更劫所  
存慰問者班班在箱笈使惡乃神護不然無寸札自此  
輒畫相後人眼徒攝

揚州

東風何索寞帶雪入揚州尚想遺釵雀重觀上玉鈎真  
同一夢覺空憶十年遊邂逅逢孫楚酣歌慰滯留

竹西寺

竹西桑柘暮鴉盤特地霜風滿倦顏不用使君相料理  
都緣塵土蔽青山

真孃墓歌

何不學仙冢累累白楊西郭陰風悲虎丘一叩真孃墓  
薜荔援牆委蘭露千歲蒙茸幾樹花夜飄鬼火曉啼鴉

向憐挾瑟彈清月猶憶吹簫乘彩霞吳閭少年往來道  
黛娥釵燕誰能好酒滴春雲夢不消泉聲幽咽鐘聲老  
陌上行游緩緩歸昨日紅顏今日非東望闔閭穿葬處  
玉鳧欲化湛盧飛

余嘗砥越竹光滑如金版在油拳上短截作小軸  
入笈番覆一日數十張學書作詩寄劉薛

越筠萬杵如金版安用杭油與池繭高壓巴郡烏絲欄  
平欺澤國清華練老無他物適心目天使殘年同筆研

圖書滿室翰墨香劉薛何時眼中見

將之茗溪戲作呈諸友

余居半載諸公載酒不輟而余以疾每約置膳清話

而已復借書

劉李周三姓

松竹留因夏溪山去為秋久賡白雪詠更度采菱謳縷  
玉鱸堆案團金橘滿洲水宮無限景載與謝公游

半載依修竹三時看好花懶傾惠泉酒點盡壑源茶主  
席多同好羣峰伴不諱朝來還蠹簡便起故巢嗟

好懶難辭友知窮豈念通貧非理生拙病覺養心功小

圃能留客青冥不厭鴻秋帆尋賀老載酒過江東  
仕倦成流落游頻慣轉蓬熱來隨意住涼至逐緣東入  
境親疎集他鄉彼此同暖衣兼食飽但覺愧梁鴻  
旅食緣交駐浮家為興來句留荆水話襟向卞峰開過  
剡如尋戴遊梁定賦枚漁歌堪畫處又有魯公陪  
密友從春拆紅薇過夏榮團枝殊自得顧我若含情漫  
有蘭隨色寧無石對聲却憐皎皎月依舊滿船行

與薛老

何必識難字辛苦笑揚雄自古寫字人用字或不通要  
之皆一戲不當問拙工意足我自足放筆一戲空

蕭閒堂詩

并序

四明從事晉陵錢君世系字延叟過襄陽米芾曰昨  
送季濟民渡江與汪行之復會蕭閒堂已撤幕壁間  
有君像題曰權杭州觀察米元章像楊之儀筆楊之  
傑贊曰君子之交小人之讐以今方人叔度宜儔余  
以袖掩字而問行之曰誰歟行之曰君也僕為檢同

氣德識面三編無君名姓嗚呼古人論世取友况同  
世哉世復有三君子者觀文殿學士王公韶字子純  
樞密直學士劉公庠字希道則僕竟不識其面選人  
蔡君肇字天啓於相知間語僕如素心腹者云得僕  
於王荆公蓋僕於元豐六年赴希道金陵從事之辟  
會公謫居始識荆公於鍾山間公門有數十後進喜  
爭名而相非又記以長者之言也如天啓樂道人善  
者一人而已僕老矣不知一蔡二楊行能識面因延

叟語發悲嘆并記其事於家集中以貽子孫嗚呼仕  
開求進之語則世人之邪說大行紛紛不求已而求  
人豈其本心實利誘然今樂善君子一何多耶彼口  
不道忠信捷捷而惡人翩翩而自喜黯黯懷奸藏慝  
竊竊掩人之善沾沾自標置者得不少悛乎既序其  
事因系以詩

誰起蕭閒堂圖贊凡醜質昧昧豈我思有懷斯士吉吾  
生終不遇二陵已相失苟養走四方公卿更絕跡向我




交漸稀背憎十六七豐吾九畹蘭任汝滿地棘我豈蕭  
閒人偶然得空壁美哉何方彥精絕入妙筆君不愧顧  
長康取媚桓溫圖九錫我不媿孟浩然緩策京山過摩  
詰前此交道久不康紛紛白頭多不卒嗚呼紛紛白頭  
多不卒回首此君應辟易

宋詩鈔卷二十七

總校官庶吉士臣張能照  
校對官庶吉士臣陳墉

謄錄監生臣浦焯



欽定四庫全書薈要

集部

宋詩鈔卷二十八

詳校官候選知縣臣吳甸華



欽定四庫全書薈要卷二萬二百八十一

集部

宋詩鈔卷二十八

內閣中書舍人吳之振編

黃庭堅山谷集鈔上

庭堅字魯直分寧人游瀟皖山谷寺石牛洞樂其勝  
自號山谷老人天下因稱山谷以配東坡過涪又號  
涪翁第進士歷知太和哲宗召為校書郎神宗實錄  
檢討官起居舍人除秘書丞國史編修官紹聖間出

知宣鄂章蔡論實錄多誣責問條對不屈貶涪州別  
駕安置黔州即日上道投牀大斲人以是賢之徽宗  
起監鄂州稅歷知舒州丐郡得太平州旋罷嘗忤趙  
挺之及相喙除名編管宜州卒年六十一宋初詩承  
唐餘至蘇梅歐陽變以大雅然各極其天才筆力非  
必鍛鍊勤苦而成也庭堅出而會萃百家句律之長  
究極歷代體制之變自成一家雖隻字半句不輕出  
為宋詩家宗祖江西詩派皆師承之史稱自黔州以

後句法尤高實天下之奇作自宋興以來一人而已  
非規模唐調者所能夢見也惟本領為禪學不免蘇  
門習氣是用為病耳

柳閱展如蘇子瞻甥也其才德甚美有意於學故  
以桃李不言下自成蹊八字作詩贈之

柳君文甚武

一作武甚

睥睨萬人豪

睥睨一作睥視

老氣鼓不作卷

旗解弓刀上為朝陽桐下為澗溪毛囊中有美實期子

種蟠桃

浮陽愧嘉魚道傍多苦李古來賢達人不爭咸陽市吾

子富春秋日月東趨

一作逝

水潛聖有玉音聞道而已矣

霜威能折綿風力欲冰酒勤子來訪道枵然我何有寢  
興與時俱由我屈伸肘飯羹自知味如此是道不

任世萬鈞重載言以為軒空文誤來世聖達欲無言咸  
池浴日月深宅養靈根胸中浩然氣一家同化元

陸沈百世師寄食魯柳下我今見諸孫風味窺大雅大  
雅久不作圖王勿成霸偉哉居移氣蘭鮑在所化

聖學魯東家恭惟同出自乘流去本遠遂有作書肆日  
中駕肩來薄晚常掉臂徒囂終無羸歸矣求已事

清潤玉泉冰高明秋景晴妙年勤翰墨銀鈎爛縱橫藍  
田生美璞未琢價連城思為萬乘器柱下貴晚成

八方去求道渺渺因多蹊歸來坐虛室夕陽在吾西君  
今秣高馬夙駕先鳴雞慎勿取我語親行乃不迷

奉和文潛贈無咎篇末多見及以既見君子云胡

不喜為韻



龜以靈故焦維以文故翳本心如日月利欲食之既後  
生玩華藻照影終沒世安得八絃置以道獵衆智

談經用燕說束棄諸儒傳濫觴雖有罪末派瀾九縣張  
侯真理窟堅壁勿與戰難以口舌爭水清石自見

野性友麋鹿君非我同羣文明近日月我亦不如君十  
載長相望逝川水泐泐何當談絕倒茗椀對鑪薰

北寺鎖齋房陳鑰時一啓晁張跫然來連壁照書几庭  
栢鬱葱葱紅榴罇多子時蒙吐佳句幽處萬籟起

先皇元豐末極厭士淺聞只今舉秀孝天未喪斯文晁  
張班馬首崔蔡不足云當令橫筆陣一戰靜楚氛

張侯窘炊玉僦屋得空鑪但見索酒郎不見酒家胡雖  
肥如瓠壺胸中殊不粗何用知如此文采似於菟

荆公六藝學妙處端不朽諸生用其短頗復鑿戶牖譬  
如學捧心初不悟已醜玉石恐俱焚公為區別不

吾友陳師道抱獨門掃軌晁張作薦書射雉用一矢吾  
聞舉逸民故得天下喜兩公陣堂堂此士可摩壘

子瞻詩句妙一世乃云效庭堅體蓋退之戲效孟郊樊宗師之比以文滑稽耳恐後生不解故以

韻道之

我詩如曹鄴淺陋不成邦公如大國楚吞五湖三江赤壁風月笛玉堂雲霧窗句法提一律堅城受我降枯松倒澗壑波濤所舂撞萬牛挽不前公乃獨力扛諸人方啗點渠非晁張雙但懷相識察牀下拜老龐小兒未可知客或許敦龐誠堪壻阿冥買紅纏酒缸

留王郎

純亮  
世弼

河外吹沙塵江南水無津骨肉常萬里寄聲何由頻我  
隨簡書來顧影將一身留我左右手奉承白頭親小邦  
王事略蟲鳥聲無人王甥解鞍馬夜語雞喚晨母慈家  
人肥女慧男垂紳有田為酒事豚韭及秋春生涯得如  
此舊學更光新索去何草草少留慰艱勤百年纔一炊  
六籍經幾秦要知胸中有不與跡同陳郢人懷妙質聊

欲運吾斤

白頭一  
作白髮

顛上食蓮有感

蓮實大如指分甘念母慈共房頭舐舐更深兄弟思實  
中有么荷拳如小兒手令我憶衆雛迎門索梨棗蓮心  
政自苦食苦何能甘甘餐恐腊毒素食則懷慙蓮生淤  
泥中不與泥同調食蓮誰不甘知味良獨少吾家雙井  
塘十里秋風香安得同裴子歸製芙蓉裳

次韻張仲謀過醵池寺齋

詢

十年醉錦幄醪醑照金沙歆眠春風底不去留君家是

時應門兒紫蘭茁其牙只今將弟妹嬉戲牽羊車忽書  
滿窻紙整整復斜斜平生悲歡事頭緒如亂麻苟祿無  
補報幾成來食嗟喜君崇名節青雲似可涯我夢江  
湖去釣船刺蘆花江濱開園宅畦蔗蒔梨柎夢驚如昨  
日炊玉困京華公來或藜羹愛我不疵瑕深念煩鄉里  
忍窮禁貸賒夜談簾幙冷霜月動金蛇即是桃李月春  
蟲語交加我亦無酒飲一室可盤媧要公共文字朱墨  
勘舛差非復少年日聲名取媿姱諸阮有二妙能詩定

自嘉何時來煮餅蟹眼試官茶

次韻子瞻送顧子敦河北都運二首

儒者給事中顧公甚魁偉經明往行河商略頗應史勞  
人又費乏國計安能已成功渠有命得人斯可喜似聞  
阻飢餘惡少驚邑里啓鑰探珠金奪懷取姝美部中十  
盜發一二書奏紙西連魏兩河東盡齊四履此豈小事  
哉何但行治水使民皆農桑乃見真儒耳

今代顧虎頭骨相自雄偉不令長天官亦合丞御史能

貧安四壁無愠可三已昨來立清班國士相顧喜何因  
將使節風日按千里汲黯不居中似非朝廷美大任錄  
萬事御坐留諫紙發政恐傷民天步薄氷履蒼生憂其  
魚南畝多被水公行圖安集信目勿信耳

跋子瞻和陶詩

子瞻謫嶺南時宰欲殺之飽喫惠州飯細和淵明詩彭  
澤千載人東坡百世士出處雖不同風味乃相似

送李德素歸舒城



僧夏莫問塗麥秋宜煮餅北寺旬休歸長廊六月冷簟  
翻寒江浪茶破蒼壁影李侯為我來遽以歸期請青衿  
廢詩書白髮違定省荒畦當鉏灌蠹簡要籤整挽衣不  
可留決去事幽屏天恢獵德網日饒養賢鼎此士落江  
湖熟思令人瘦胷中吉祥宅膜外榮辱境婆婆萬物表  
藏刃避肯綮人生要當學安燕不徹警古來惟深地相  
待汲脩綆

次韻冕仲考進士試卷

少來迷翰墨無異蟲蠹木諸生程藝文承詔當品目牀  
敷設箱篚賦納忽數束變名混甲乙騰寫失句讀晝窗  
過白駒夜几跋紅燭釣深思嘉魚攻璞願良玉談天用  
一律呻訊厭重複絲布澀難縫快意忽破竹聖言裨曲  
學割袞綴邪幅注金無全巧竊發或中鵠翟公辟靡老  
薪煇茂棫樸御史威降霜行私不容粟吏部提英鑿片  
善蒙采錄博士刈其楚銓量頗三復因人享成事賤子  
真碌碌

次韻答秦少章乞酒

觀

朝事鞍馬早吏曹文墨拘初無尺寸補但於友朋疎豈  
知簞瓢子卧起一床書炙背道堯舜雪屋相與娛步出  
城東門野鳥吟廢墟頗知富貴事勢窮心亦舒詩來獻  
窮狀水餅嚼冰蔬斗酒得醉否枵腹如瓠壺亦可名西  
舍侯嬴非博徒

贈秦少儀

觀

汝南許文休馬磨自衣食但聞郡功曹滿世名籍籍渠

命有顯晦非人作通塞秦氏多英俊少游眉最白頗聞  
鴻雁行筆皆萬人敵吾早知有覲而不知有覲少儀袖  
詩來剖蚌珠的皪乃能持一鏃與我箭鋒直自吾得此  
詩三日卧向壁挽士不能寸推去輒數尺才難不其然  
有亦未易識

此詩一作此士  
挽士一作挽來

次韻子實題少章寄寂齋

虛名誤壯夫今古可笑閔屍裹萬里歸書載五車攜安  
知衡門下身與天地準秦晁兩美士內行頗修謹余欲

造之深抽琴去其軫寄寂喧闕間此道

一作鈞深

有汲引獄

戶聞咎榜市聲雜嘲鞮二生對曲肱圭玉發石蘊小大窮

鵬鷄短長見椿槿

一作付椿槿

欲聞寂時聲黃鍾在龍筍

次韻謝斌老送墨竹十二韻

古今作生竹能者未十輩吳生勒枝葉筌窠遠不逮江  
南鐵鉤鎖最許誠懸會燕公洒墨成落落與時背譬如  
刳心松中有歲寒在湖州三百年筆與前哲配規摹轉  
銀鈎幽賞非俗愛披圖風雨入咫尺莽蒼外吾子學湖

州師逸功已倍有來竹四幅冬夏生變態預知更入神  
後出遂無對吾詩被壓倒物固不兩大

世傳江南李正作竹自根至梢

極小者一一鈎勒成謂之鐵鈎  
鎖自云惟柳公權有此筆法

### 次韻答斌老病起獨游東園

主人心安樂花竹有和氣時從物外賞自益酒中味  
斲枯蟻改穴掃籜笋迸地萬籟寂中生乃見風雨至

### 顏徒貧樂二首

衡門低首過環堵容膝坐四傍無給侍百衲自纏裹  
論

事直如絃觀書曲肱卧飢來或乞食有道無不可  
小山作友朋義重子輿桑香草當姬妾不須珠翠粧烏  
烏窺凍硯星月入幽房兒報無炊米浩歌繞屋梁

以椰子茶瓶寄德孺

炎丘椰木實入用隨茗椀譬如楛石砮但貴從來遠往  
時萬里物今在籬落間知君一拂拭想我瘴霧顏

次韻子瞻題郭熙畫秋山

黃州逐客未賜環江南江北飽看山玉堂卧對郭熙畫

發興已在青林間  
郭熙官畫但荒遠  
短紙曲折開秋晚  
江村烟外雨脚明  
歸雁行邊餘疊巘  
坐思黃甘洞庭霜  
恨身不如雁隨陽  
熙今頭白有眼力  
尚能弄筆映窗光  
畫取江南好風日  
慰此將老鏡中髮  
但熙肯畫寬作程  
五日十日一水石

詠李伯時摹韓幹三馬次蘇子由韻簡伯時兼寄

李德素

太史瑣窻雲雨垂  
試開三馬拂蛛絲  
李侯寫影韓幹墨



自有筆如沙畫錐絕塵超日精爽緊若失其一望路馳  
馬官不語臂指揮乃知仗下非新羈吾嘗覽觀在垆馬  
駑駘成列無權奇緬懷胡沙英妙質一雄可將十萬雌  
決非廝養所成就天驥生駒人得之千金市骨今何有  
士或不價五殺皮李侯畫隱百寮底初不自期人誤知  
戲弄丹青聊卒歲身如閱世老禪師

次韻子瞻和子由觀韓幹馬因論伯時畫天馬

于闐花驄龍八尺看雲不受絡頭絲西河驄作葡萄錦

雙瞳夾鏡耳卓錐長楸落日試天步知有四極無由馳  
電行山立氣深穩可耐珠羈白玉羈李侯一顧嘆絕足  
領畧古法生新奇一日真龍入畫圖在垆羣雄望風雌  
曹霸弟子沙苑丞喜作肥馬人笑之李侯論幹獨不爾  
妙盡骨相遺毛皮翰林評書乃如此賤肥貴瘦渠未知  
况我平生賞神俊僧中云是道林師俊一作駿

戲和文潛謝穆父松扇

猩毛束筆魚網紙松拊織扇清相似動搖懷袖風雨來

想見僧前落松子張侯哦詩松韻寒六月火雲蒸肉山  
持贈小君聊一笑不須射雉設黃間

次韻王炳之惠玉版紙

伯虎

王侯須若緣坡竹哦詩清風起空谷古田小牋惠我百  
信知溪翁能解玉鳴磬千杵動秋山裹糧萬里來輦轂  
儒林丈人有蘇公相如子雲再生蜀往時翰墨頗橫流  
此公歸來有邊幅小楷多傳樂毅論高詞欲奏雲門曲  
不持歸掃蘇公門乃令小人今拜辱去騷甚遠文氣卑

畫虎不成書勢俗董狐南史一筆無誤掌殺青司紀錄  
雖然此中有公議或辱五鼎榮半菽願公進德使見書  
不敢求君米千斛

雙井茶送子瞻

人間風日不到處天上玉堂森寶書想見東坡舊居士  
揮毫百斛瀉明珠我家江南摘雲腴落磴霏霏雪不如  
為公喚起黃州夢獨載扁舟向五湖

常父答詩有煎點徑須煩綠珠之句復次韻戲答

小鬟雖醜巧粧梳掃地如鏡能檢書欲買娉婷供煮茗  
我無一斛明月珠知公家亦闕掃除但有文君對相如  
政當為公乞如願作牋遠寄宮亭湖

戲呈孔毅父

平仲

管城子無食肉相孔方兄有絕交書文章功用不經世  
何異絲窠綴露珠校書著作頻詔除猶能上車問何如  
忽憶僧床同野飯夢隨秋雁到東湖

以團茶洮州綠石研贈無咎文潛

晁子智囊可以括四海張子筆端可以回萬牛自我得  
二士意氣傾九州道山延閣委竹帛清都太微望冕旒  
貝宮胎寒弄明月天網下罩一日收此地要須無不有  
紫皇訪問富春秋晁無咎贈君越侯所貢蒼玉璧可烹  
玉塵試春色澆君曾中過秦論斟酌古今來活國張文  
潛贈君洮州綠石含風漪能淬筆鋒利如錐請書元祐  
開皇極第八思齊訪落詩

謝送碾賜壑源揀芽

喬雲從龍小蒼壁元豐至今人未識壑源包貢第一春  
緬匱碾香供玉食睿思殿東金井欄甘露薦椀天開顏  
橋山事嚴龙百局補袞諸公省中宿中人傳賜夜未央  
雨露恩光照宮燭左丞似是李元禮好事風流有涇渭  
肯憐天祿校書郎親勅家庭遣分似春風飽識大官羊  
不慣腐儒湯餅腸搜攪十年燈火讀令我胃中書傳香  
已戒應門老馬走客來問字莫載酒

補袞一作  
表司

以小團龍及半挺贈無咎并詩用前韻為戲

我持玄圭與蒼璧以暗投人渠不識城南窮巷有佳人  
不索賓郎常晏食赤銅茗椀雨班班銀粟翻光解破顏  
上有龍文下棋局擔囊贈君諾已宿此物已是元豐春  
先皇聖功調玉燭晁子胸中開典禮平生自期莘與渭  
故用澆君磊砢曾莫令鬢毛霜相似曲几團蒲聽煮湯  
煎成車聲繞羊腸雞蘇胡麻留渴羌不應亂我官焙香  
肥如瓠壺鼻雷吼幸君飲此勿飲酒

擔囊一作探囊

### 觀伯時畫馬



儀鸞供帳饗蟲行翰林濕薪爆竹聲風簾官燭淚縱橫  
木穿石槃未渠透坐窗不遨令人瘦貧馬百賢逢一豆  
眼明見此五花驄徑思著鞭隨詩翁城西野桃尋小紅  
次韻子瞻送李易

驥子墮地追風日未試千里誰能識習之實錄葬皇祖  
斯文如女有正色今年持橐佐春官遂失此人難塞責  
雖然一閔有奇耦博懸於投不在德君看巨浸朝百川  
此豈有意潢潦前願為霧豹懷文隱莫愛風蟬蛻骨仙

次韻子瞻寄眉山王宣義

叅軍但有四立壁初無臨江千木奴白頭不是折腰具  
桐帽棕屨稱老夫滄江鷗鷺野心性陰壑虎豹雄牙須  
鷓鴣作裘初服在猩血染帶鄰翁無昨來杜鵑勸歸去  
更得把酒聽提壺當今人材不乏使天上二老須人扶  
兒無飽飯尚勤書婦無複禪且著襦社甕可漉溪可漁  
更問黃雞肥與癯林間醉著人伐木猶夢官下聞追呼  
萬釘圍腰莫愛渠富貴安能潤黃壚

聽宋宗儒摘阮歌

翰林尚書宋公子文采風流今尚爾自疑耆域是前身

囊中探丸起人

一作九

死貌如千歲枯松枝落魄酒中無

定止得錢百萬送酒家一笑不問今餘幾手揮琵琶送

飛鴻促絃聒醉驚客起寒蟲催織月籠秋獨雁叫羣天

拍水楚國羈臣放十年漢宮佳人嫁千里深閨洞房語

恩怨紫燕黃鸝韻桃李楚狂行歌驚市人漁父挈舟在

葭葦問君枯木著朱繩何能道人意中事君言此物傳

數姓玄璧庚庚有橫理閉門三月傳國工身今親見阮  
仲容我有江南一丘壑安得與君醉其中曲肱聽君寫

松風

琵琶一  
作阮咸

答黃冕仲索煎雙井并簡揚休

裳

江夏無雙乃吾宗同舍頗似王安豐能澆茗椀湔被我  
風袂欲挹浮丘翁吾宗落筆賞幽事秋月下照澄江空  
家山鷹爪是小草敢與好賜雲龍同不嫌水厄幸來辱  
寒泉湯鼎聽松風夜堂朱墨小燈籠惜無纖纖來捧椀

唯倚新詩可傳本

再答冕仲

丘壑詩書雖數窮  
田園芋栗頗時豐  
小桃源口雨繁紅  
春溪蒲稗沒鳧翁  
投身世網夢歸去  
摘山鼓聲雷隱空  
秋堂一笑共燈火  
與公草木臭味同  
安用茗澆磊砢骨  
他日過飯隨家風  
買魚貫柳雞著籠  
更當力貧開酒椀  
走謁鄰翁稱子本

戲答陳元興

軒

平生所聞陳汀州蝗不入境年屢豐東門拜書始識面  
鬢髮幸未成老翁官饗同盤厭腥膩茶甌破睡秋堂空  
自言不復蛾眉夢枯淡頗與小人同但憂迎笑花枝紅  
夜窗冷雨打斜風秋衣沈水換薰籠銀屏宛轉復宛轉  
意根難拔如薤本

考試局與孫元忠博士竹間對窗夜聞元忠誦書  
聲調悲壯戲作竹枝歌三章和之

朴

南窗讀書聲吾伊北窗見月歌竹枝我家白髮問烏鵲

他家紅粧占蛛絲

屋山啼鳥兒當歸  
玉釵冒蛛郎馬嘶  
去時燈火正月半  
階前雪消萱草齊

勃姑夫婦喜相喚  
街頭雪泥即漸乾  
已放遊絲高百尺  
不應桃李尚春寒

王稚川既待

一作得

官都下有所盼  
未歸予戲作林

夫人欸乃歌二章  
與之竹枝歌本出  
三巴其流

在湖湘耳欸乃乃湖南歌也

欸音襖  
乃音藹

花上盈盈人不歸  
棗下纂纂實已垂  
臘雪在時聽馬嘶  
長安城中花片飛

從師學道魚千里  
蓋世成功黍一炊  
日日倚門人不見  
看盡林鳥反哺兒

演雅

桑蠶作繭自纏裹  
珠螫結網工遮邏  
燕無居舍經始忙  
蝶為風光勾引破  
老鷓銜石宿水飲  
穉蜂趨衙供蜜課  
鵲傳吉語安得閒  
雞催晨興不敢卧  
氣陵千里蠅附驥



枉過一生蟻旋磨蝨聞湯沸尚血食雀喜宮成自相賀

晴天振羽樂蜂螭空穴祝兒成螺羸蝓轉丸賤蘇合

飛蛾赴燭甘死禍井邊蠹李螬苦肥枝頭飲露蟬常餓

天螻伏隙錄人語射工含沙須影過訓狐啄屋真行怪

蠨蛸報喜太多可鸕鷀密伺魚蝦便白鷺不禁塵土灑

絡緯何嘗省機織布穀未應勤種播五技鼯鼠笑鳩拙

百足馬虻憐驚跛老蚌胎中珠是賊醯雞瓮裏天幾大

螳螂當轍恃長臂熠燿宵行驚照火提壺猶能勸沽酒

黃口只知貪飯顆，伯勞饒舌世不問。  
鸚鵡繞言便關鎖，春蛙夏蚓更嘈雜。  
土蚓壁蟬何碎瑣，江南野水碧於天。  
中有狎鷗閒似我。

狎一作白

戲答趙伯充勸莫學書及為席子澤解朝

叔益延賞

平生飲酒不盡味，五鼎餽肉如嚼蠟。  
我醉欲眠便遣客，三年窺牆亦面壁。  
空餘小來翰墨場，松烟兔穎傍明窗。  
偶隨兒戲洒墨汁，衆人許在崔杜行。  
晚學長沙小三昧，幻出萬物真成狂。  
龍蛇起陸雷破柱，自喜奇觀繞繩牀。

家人罵笑寧有道，污染黃素敗粉牆。誠不如南隣席明  
府，珠網鎖硯蝸書梁。懷中探九起九死，才術頗似漢太  
倉。感君詩句喚夢覺，邯鄲初未熟黃梁。身如朝露無牢  
強，玩此白駒過隙光。從此永明書百卷，自公退食一  
爐香。

出城送客過故人東平侯趙景珍墓

今墳

朱顏苦

一作欲

留不肯住，白髮政爾欺得人。嬋娟去作誰

家妾，意氣都成一聚塵。今日牛羊上丘壟，當時近前左

右嗔花開鳥啼荆棘裏誰與平章作好春

題小猿叫驛

知命

大猿叫罷小猿啼  
箒裏行人白晝迷  
惡藤牽頭石齧足  
嫗牽兒隨淚陸續  
我亦不行莫啼哭

王充道送水仙花五十枝欣然會心為之作詠

凌波仙子生塵襪  
水上輕盈步微月  
是誰招此斷腸魂  
種作寒花寄愁絕  
含香體素欲傾城  
山礬是弟梅是兄  
坐對真成被花惱  
出門一笑大江橫

武昌松風閣

依山築閣見平川  
夜闌箕斗插屋椽  
我來名之意適然  
老松魁梧數百年  
斧斤所赦今參天  
風鳴媧皇五十絃  
洗耳不須菩薩泉  
嘉二三子甚好賢  
力貧買酒醉此筵  
夜雨鳴廊到曉懸  
相看不歸卧僧氈  
泉枯石燥復潺湲  
山川光輝為我妍  
野僧早飢不能饘  
曉見寒溪有炊煙  
東坡道人已沈泉  
張侯何時到眼前  
釣臺驚濤可晝眠  
怡亭看篆蛟龍纏  
安得此身脫拘攣  
舟載諸友長周旋

次韻文潛

武昌赤壁弔周郎寒溪西山尋漫浪忽聞天上故人來  
呼船凌江不待餉我瞻高明少吐氣君亦歡喜失微恙  
年來鬼祟覆三豪詞林根柢頗搖蕩天生大材竟何用  
只與千古拜閣像張侯文章殊不病歷險心膽元自壯  
汀洲鴻雁未安集風雪牖戶當塞向有人出手辦茲事  
政可隱几窮諸妄經行東坡眠食地拂拭寶墨生楚愴  
水清石見君所知此是吾家秘密藏

閣像一作遺像

書磨崖碑後

春風吹船著浯溪扶藜上讀中興碑平生半世看墨本  
摩挲石刻髻成絲明皇不作苞桑計顛倒四海由祿兒  
九廟不守乘輿西萬官已作烏擇栖撫軍監國太子事  
何乃趣取大物為事有至難天幸爾上皇跼蹐還京師  
內間張后色可否外間李父頤指揮南內淒涼幾苟活  
高將軍去事尤危臣結春陵二三策臣甫杜鵑再拜詩  
安知忠臣痛至骨世上但賞瓊琚詞同來野僧六七輩

亦有文士相追隨  
斷崖蒼蘚對立久  
凍雨為洗前朝悲  
再答元輿

君不能入身帝城  
結子公又不能擊  
強有如諸葛豐法  
當憔悴百寮底  
五十天涯一秃翁  
問君何自今為郎  
便殿作賦聲  
摩空偶然樽酒相  
勞苦牛鐸調與黃  
鍾同安得朱幡各  
憑熊江南樓閣白  
蘋風勸歸啼鳥曉  
窗籠男兒邂逅功  
補袞烏倦歸巢葉  
歸本

送王郎



酌君以蒲城桑落之酒泛君以湘纍秋菊之英贈君以  
黔川點漆之墨送君以陽關墮淚之聲酒澆胸中之磊  
砢菊制短世之頽齡墨以傳千古文章之印歌以寫一  
家兄弟之情江山萬里頭俱白骨肉十年眼終青連牀  
夜語難戒曉書囊無底談未了有功翰墨乃如此何恨  
遠別音書少炒沙作糜終不飽鏤冰文章費工巧要須  
心地收汗馬孔孟行世日杲杲有弟有弟力持家婦能  
養姑供珍鮭兒大詩書女絲一作桑麻麻公但讀書煮春茶

送舅氏野夫之宣城二首

李莘

籍甚宣城郡風流數貢毛  
霜林收鴨脚春網薦琴高  
共理須良守今年輟省曹  
平生割雞手聊試發硎刀

試說宣城郡停杯且細聽  
晚樓明宛水春騎簇昭亭  
祀稷豐圩戶桁楊卧訟庭  
謝公歌舞處時對換鵝經

次韻崔伯易席上所賦因以贈行

迎新與送故渠已不勝  
勤民賣腰間劍公寬柱後文  
諸郎投賜沐高會惜臨分  
去國雖千里分憂即近君

次韻秦少章晁適道贈答詩

二子論文地陰風雪塞廬寧穿東郭履不奉子公書士  
固難推挽時聞有詔除負暄真得計獻御恐成疎

次韻答高子勉

君不居郎省還應上諫坡才高殊未識歲晚喜無它  
樞馬羸難出鄰雞凍不歌寒爐餘幾火灰裏撥陰何  
志士難推轂將如高子何心期誠不淺餘論或相多  
欲向滄洲去還能小艇麼鷓鴣西照處相並晒漁蓑

次韻柳通叟寄王文通

故人昔有凌雲賦，何意陸沈黃綬間。  
頭白眼花行作吏，兒婚女嫁望還山。  
心猶未死杯中物，春不能朱鏡裏顏。  
寄語諸公肯前被，割雞令得近鄉關。

次韻王定國揚州見寄

清洛思君晝夜流，北歸何日片帆收。  
未生白髮猶堪酒，垂上青雲却佐州。  
飛雪堆盤鱸魚腹，明珠論斗煮雞頭。  
平生行樂自不惡，豈有竹西歌吹愁。

寄黃綏復

我居北海君南海寄雁傳書謝不能  
桃李春風一杯酒  
江湖夜雨十年燈持家但有四立壁  
治病不斬三折肱  
想得讀書頭已白隔溪猿哭瘴溪藤

次韻綏復和答所寄

海南海北夢不到會合乃非人力能  
地褊未堪長袖舞  
夜寒空對短檠燈相看鬢髮時  
窺鏡曾共詩書更曲肱  
作箇生涯終未是故山松長到天藤

寄上叔父夷仲二首

少年有功翰墨林中歲作吏幾陸沈庖丁解牛妙世故  
監市履豨知民心萬里書來兒女瘦十月山行冰雪深  
夢魂和月遶秦隴漢節落毛何處尋

關寒塞雪欲嗣音燕雁拂天河鯉沈百書不如一見面  
幾日歸來兩慰心弓刀陌上望行色兒女燈前語夜深  
更懷父子東歸得手種江頭柳十尋

次韻宋楙宗僦居甘泉坊雪後書懷

漢家太史宋公孫漫逐班行謁帝閣燕頷封侯空有相  
蛾眉傾國自難昏家移四壁書侵坐馬瘦三山葉擁門  
安得風帆隨雪水江南石上對窪樽

馬瘦一作馬聳

次韻宋楙宗三月十四日到西池都人盛觀翰林

公出遊

金狨繫馬曉鶯邊不比春江上水船人語車聲喧法曲  
花光樓影倒晴天人間化鶴三千歲海上看羊十九年  
還作遨遊驚俗眼風流文物屬蘇仙

次韻楊君全送酒長句

扶衰却老世無方，唯有君家酒未嘗。  
秋入園林花老眼，茗搜文字響枯腸。  
醉頭夜雨排簷滴，盃面春風繞鼻香。  
不待澄清遣分送，定知佳客對空觴。

贈李輔聖

交蓋相逢水急流，八年今復會荊州。  
已回青眼追鴻翼，肯使黃塵沒馬頭。  
舊管新收幾粒鏡，流行坎止一虛舟。  
相看絕歎女博士，筆硯管絃成古丘。

女博士謂輔聖後房孔居也於文藝



無不  
妙絕

和高仲本喜相見

雨昏南浦曾相對雪滿荊州喜再逢  
有子才如不羈馬知公心是後彫松  
閒尋書冊應多味老傍人門似更慵  
何日晴軒觀筆硯一尊相屬要從容

新喻道中寄元明用觴字韻

中年畏病不舉酒孤負東來數百觴  
喚客煎茶山店遠看人秧稻午風涼  
但知家裏俱無恙不用書來細作行

一百八盤攜手上至今猶夢遶羊腸

湖口人李正臣蓄異石九峰東坡先生名曰壺中  
九華并為作詩後八年自海外歸過湖口石已  
為好事者所取乃和前篇以為笑實建中靖國  
元年四月十六日明年當崇寧之元五月二十  
日庭堅繫舟湖口李正臣持此詩來石既不可  
復見東坡亦下世矣感歎不足因次前韻

有人夜半持山去頓覺浮嵐暎翠空試問安排華屋處

何如零落亂雲中能迴趙壁人安在已入南柯夢不通  
賴有霜鍾難席卷袖椎來聽響玲瓏

追和東坡題李亮功歸來圖

今人常恨古人少今得見之誰謂無欲學淵明歸作賦  
先煩摩詰畫成圖小池已築魚千里隙地仍栽芋百區  
朝市山林俱有累不居京洛不江湖

王才元惠梅花三種皆妙絕戲答三首

棧

城南名士遣春來三月乃見臘前梅定知鎖著江南客

故放綠梢春晚回

梢一作陰

舍人梅塢無關鎖攜酒俗人來未曾舊時愛菊陶彭澤  
今作梅花樹下僧

病夫中歲屏杯杓百葉緗梅觸撥人拂殺官黃春有思

滿城桃李不能春

殺一作掠

題伯時畫頓塵馬

竹頭搶地風不舉文書堆案睡自語忽看高馬頓風塵  
亦思歸家洗袍袴

竹枝詞二首

古樂府有巴東三峽巫峽長猿鳴三聲淚霑裳但以  
抑怨之音和為數疊惜其聲今不傳予自荊州上峽  
入黔中備嘗山川險阻因作二疊傳與巴娘令以竹  
枝歌之前一疊可和云鬼門關外莫言遠五十三驛  
是皇州後一疊可和云鬼門關外莫言遠四海一家  
皆弟兄或各用四句入陽關小秦王亦可歌也

撐崖拄谷蝮蛇愁入箐攀天猿掉頭鬼門關外莫言遠

五十三驛是皇州

浮雲一百八盤縈落日四十九渡明鬼門關外莫言遠  
四海一家皆弟兄

予既作竹枝詞夜宿歌羅驛夢李白相見於山間  
曰予往謫夜郎於此聞杜鵑作竹枝詞三疊世  
傳之不予細憶集中無有請三誦乃得之

一聲望帝花片飛萬里明妃雪打圍馬上健兒那解聽  
琵琶應道不如歸

竹竿坡面蛇倒退摩圍山腰胡孫愁杜鵑無血可續淚  
何日金雞赦九州

命輕人鮓甕頭船日瘦鬼門關外天北人墮淚南人笑  
青壁無梯聞杜鵑

題驢瘦嶺馬鋪

知命

老馬飢嘶驢瘦嶺病人生入鬼門關病人甘作五溪卧  
老馬猶思十二閑

上南陵坡

知命

風餐水宿六千里蛇退猿愁百八盤上得坡來摠歡喜  
摩圍依約見峰巒

病起荆江亭即事十首

翰墨場中老伏波菩提坊裏病維摩近人積水無鷗鷺  
時有歸牛浮鼻過

維摩老子五十七天子大聖初元年傳聞有意用幽側  
病著不能朝日邊

禁中夜半定天下仁風義氣徹脩門十分整頓乾坤了



復辟歸來道更尊

成王小心似文武周召何妨畧不同不須要出我門下  
實用人材即至公

司馬丞相昔登庸招用元老超羣公楊綰當朝天下喜  
斷碑零落卧秋風

死者已死黃霧中三事不數兩蘇公豈謂高才難駕御

空歸萬里白頭翁

謂一作為

文章韓杜無遺恨草詔陸贄傾諸公玉堂端要真學士

須得儋州秃髻翁

閉門覓句陳無已對客揮毫秦少游正字不知溫飽未

西風吹淚古藤州

吹一作揮

張子耽酒語蹇吃聞道穎州又陳州形模彌勒一布袋  
文字江河萬古流

魯中狂士邢尚書本意扶日上天衢惇夫若在鑄此老

不令平地生崎嶇

生一作成一

謝答聞善二兄

身入醉鄉無畔岸心與歡伯為友朋更闌罵坐客星散  
午過未蘇髮鬢髻

羣猪過飲尚可醉疥手輟甕庸何傷柳家兄弟太迫窄  
狂藥不容人發狂

公擇醉面桃花紅人百忤之無愠容莘老夜闌傾數斗

焚香默坐日生東

李公擇尚書  
孫莘老中丞

推牀破面棖觸人作無義語怒四鄰尊中歡伯笑爾輩  
我本和氣如三春

陶令舍中有名酒無夕不為父老傾四坐歡欣觀酒德  
一燈明滅又詩成

次韻向何卿行松滋縣與鄒天錫夜語南極亭

衝風衝雨走七縣唯有白鷗盟未寒坐中更得江南客  
開盡南窗借月看

戲簡朱公武劉邦直田子平

朱公趨朝瘦至骨歸來豪健踞胡牀日看省曹閣者面  
何如田家侍兒粧

戲贈米元章二首

萬里風帆水著天，麝煤鼠尾過年年。  
滄江靜夜虹貫月，定是米家書畫船。

我有元暉古印章，印刻不忍與諸郎。  
虎兒筆力能扛鼎，教字元暉繼阿章。

往歲過廣陵，值早春嘗作詩云：春風十里珠簾捲，  
鬢髻三生杜牧之。紅藥梢頭初蠶栗，揚州風動  
鬢成絲。今春有自淮南來者，道揚州事戲以前。

韻寄王定國二首

淮南二十四橋月馬上時時夢見之  
想得揚州醉年少  
正圍紅袖寫烏絲

日邊置論誠深矣聖處時中乃得之  
莫作秋蟲促機杼  
貧家能有幾鈎絲

從張仲謀乞臘梅

聞君寺後野梅發香蜜染成官樣黃  
不擬折來遮老眼  
欲知春色到池塘

寄杜家父二首

紅紫爭春觸處開  
九衢終日攢車雷  
閒情欲被春將去  
鳥喚花驚只麼回

風塵點汗青春面  
自汲寒泉洗醉紅  
徑欲題詩嫌浪許  
杜郎覓句有新功

寺齋睡起

桃李無言一再風  
黃鸝唯見綠怱怱  
人言九事八為律  
倘有江船吾欲東

次韻王稚川客舍

身如病鶴翅翎短心似亂絲頭緒多此曲朱門歌不得  
湖南湖北竹枝歌

六月十七日晝寢

紅塵席帽烏鞞裏相見滄洲白鳥雙馬齧枯萁喧午枕  
夢成風雨浪翻江

呈楊康國

君家秋實羅浮種已作累累半拂牆莫遣兒童酸打盡



要看霜後十分黃

雨中登岳陽樓望君山二首

投荒萬死鬢毛斑  
生入瞿塘滌瀨關  
未到江南先一笑  
岳陽樓上對君山

滿川風雨獨凭欄  
綰結湘娥十二鬟  
可惜不當湖水面  
銀山堆裏看青山

寄賀方回

少游醉卧古藤下  
誰與愁眉唱一盃  
解作江南斷腸句

只今唯有賀方回

戲答王子予送凌風菊二首

病來孤負鷓鴣杓  
禪板蒲團入眼中  
浪說閒居愛重九  
黃花應笑白頭翁

王郎頗病金瓢酒  
不耐寒花晚更芳  
瘦盡腰圍怯風景  
故來歸我一枝香

次韻文潛立春日絕句

渺然今日望歐梅  
已發黃州首更回  
試問淮南風月主

新年桃李為誰開

求范子默染鴉青紙

學似貧家老破除古今迷忘失三餘極知鵠白非新得

漫染鴉青韻舊書

老一作免

伯時彭蠡春牧圖

岳陽樓上春已歸湖中鴻雁拍波飛布帆天濶隨鳥道  
石林風晚吹人衣春水初生及馬腹浮灘欲上西山麓  
遙看絕嶺秀雲松上有垂蘿暗溪谷沙眠草嚙性不驕

側身注目鳴相招林間瞥過星爍爍原上獨立風蕭蕭  
君不見中原真種邊塵沒南行市骨何倉卒祇收力健  
載征夫肯向時危辨奇骨即今貢馬西北來東西坊監  
屯雲開紛然駕驥同一秣爾可不憂四蹄脫

臨河道中

村南村北禾黍黃穿林入塢岐路長據鞍夢歸在親側  
弟妹婦女笑兩廂甥姪跳梁暮堂下唯我小女始扶床  
屋頭撲棗爛盈斗嬉戲喧爭挽衣裳覺來去家三百里

一園兔絲花氣香可憐此物無根本依草著木浪自芳

風煙雨露非無力年年結子飄路傍不如歸種秋柏實

他日隨我到冰霜

臨河屬開德路由河隄今集中有曹村道中一首瓜田餘蔓有荒隴梨子

壓枝鋪短墻明月風烟如夢寐平生親舊隔湖湘是也蓋經行先曹村後臨河故前詩有覺來去家三百里之

句指大名也

### 觀劉永年團練畫角鷹

劉侯才勇世無敵愛畫工夫亦成癖弄筆掃成蒼角鷹

殺氣稜稜動秋色爪拳金鈎背屈鐵萬里風雲藏勁翮

兀立槎枒不畏人眼看青冥有餘力霜飛晴空塞艸白  
雲垂四野陰山黑此時軒然盍飛去何乃嶺岼立西壁  
祇應真骨下人世不謂雄姿留粉墨造次更無高鳥喧  
等閒亦恐狐狸赫旁觀未必窮神妙乃是天機貫胸臆  
瞻相突兀摩空材想見其人英武格傳聞揮毫頗容易  
持以與人無甚惜物逢真賞世所珍此畫他年恐難得

同宋景瞻分題汴上行

東風何時來堤柳芳且柔河水日已銷漫漫春水流寒

梅未破萼芳草綠猶稠歲月不我還念此人生浮高車  
無完輪積水有覆舟鹿門不返者誰得從之游

奉答固道

平生湖海漁竿手強學來操製錦刀末俗相看終眼白  
古人不見想山高未乘春水歸行李倘得閒官去坐曹  
自是無能欲樂爾煩君錯為歎賢勞

次韻公秉子由十六夜憶清虛

九陌無塵夜際天兩都風物各依然車馳馬逐燈方鬧

地靜人閒月自妍  
佛館醉談懷舊歲  
齊宮詩思鎖今年  
但聞公子微行去  
門外驂騑立繡韉

謝王炳之惠茶

平生心賞建溪春  
一丘風味極可人  
香包解盡寶帶胯  
黑面碾出明窗塵  
家園鷹爪改嘔冷  
官焙龍文常食陳  
於公歲取壑源足  
勿遣沙溪來亂真

還家呈伯氏

葉縣作

去日櫻桃初破花  
歸來著子如紅豆  
四時驅迫少須臾



兩鬢飄零成老醜永懷徃在江南日原上急難風雨後  
私田苦薄王稅多諸弟號寒諸妹瘦扶將白髮渡江來  
吾二人如左右手苟從祿仕我豈回且慰家貧兄孝友  
強趨手板汝陽城更責愆期被訶詬法官毒螫草自搖  
丞相霜威人避走賤貧孤遠蓋如此此事端於我何有  
一囊粟麥七千錢五人兄弟二十口官如元亮且折腰  
心似次山羞曲肘北窗書冊久不開筐篋黃塵生鏤鈕  
何當畧得共討論况乃雍容把杯酒意氣敷腴貴壯年

不早計之且衰朽安得短船萬里隨江風養魚去作陶  
朱公斑衣奉親伯與儂四方上下相依從用舍由人不  
由已迺是伏轅駒犢耳

次韻時進叔二十六韻

時子河上園竹間開棟宇大兒勝衣冠小兒豐頰輔嫁  
女與朱公伏臘可稱舉髮疎雖蒼莨齒嚼未齟齬雞栖  
牛羊下各自有室處四墻規模小易守若滕宮舍前花  
木深春物麗觀觀舍後曲池哇齋堂風月苦此豈不足

歎歎歲不我與客宦孤雲耳未知秦吳楚向來千駟公  
果愧一丘土寧當損軒昂聊欲效俯偃時子欣然笑吾  
已寤倉鼠少猶守章句晚實愛農圃鵲巢最知風蟻穴  
識陰雨世網事諳委醉鄉俗淳古坐忘兩家說肉豎與  
腸腐酒至即使傾客來敢辭宴時邀五柳陶共過三徑  
詎往在少年場豪氣壓潁汝借令今尚爾真復難共語  
稍知憐麴蘖漸解等灘漈朋友半山阿光陰共行旅人  
故義當親衣故義當補飛鳧王令尹期我向君所君為

拂眠床淹留莫成阻

水自河出為滙  
自濟出為澗

招子高二十二韻兼簡常甫世弼

我行向厭次夏扇日在搖甘瓜未除壟高柳尚鳴蜩  
駕言聊攝歸飛霜曉封條負薪泣裘褐公子御狐貂  
歲月坐晚晚鬢顏颯然凋道德千古事斯文非一朝  
往者我不及後生多見超吾黨二三子士林聳孤標  
小謝抱周易忘言獨叅寥崔郎楚左史二典考舜堯  
王生風雅學談辯秋江湖洒筆驚有司小敵謂可驕  
安知擣菹局臨

關敗三臬三生數步隔屢赴茗椀邀小謝殊未來我覺  
百里遙問之憂菽水心慮極無聊父憐母不訶日以濁  
酒澆此道如鼎實念子羹未調古來有親養回也樂一  
瓢不田鷄生實在物乃為妖吾言有師承可信如斗杓  
詩以解子憂亦用當子招

林為之送筆戲贈

閻生作三副規摹宣城葛外貌雖銑澤豪心或粗糲巧  
將希栗尾拙迺成棗核李慶縛散草含墨能不洩病在

惜白毫往往半巧拙小字亦周旋大字難曲折時時一  
毛亂迺似逆梳髮張鼎徒有表徐偃元無骨模畫記姓  
名亦可應倉卒為之街南居時通鈴下謁晴軒坐風涼  
怪我把枯筆開囊撲蠹魚遣奴送一束洗硯磨松煤揮  
洒至日沒蚤年學屠龍適用固踈濶廣文困齏鹽烹茶  
對秋月略無人問字況有客投轄文章寄呻吟講授費  
頰舌閒無用心處雌黃到筆墨時不與人游孔子尚愛  
日作詩當鳴鼓聊自攻短闕

再和答為之

君勿嘲廣文  
沍寒被絺葛  
君勿嘲廣文  
窮年飯粢糲  
常恐俎豆予  
與世充肴核  
凡木不願材  
大折小枝洩  
櫟依曲轅社  
聊用神其拙  
吾家本江南  
一丘藏曲折  
瀕溪蔭蒼葭  
蕭洒可散髮  
既無使鬼錢  
又無封侯骨  
薄祿庇閒曹  
且免受逼卒  
為此懶出門  
徒敝懷中謁  
直齋賓客退  
風物供落筆  
詩成著牀頭  
不知今幾東  
君何向予勤  
見詩歎埋沒  
嗣宗須酒澆  
未信曾懷濶  
自狀一片心  
碧潭

浸寒月令德感來教為君賦車轄君息揚雄吒何似張  
儀舌此意恐太狂願為引繩墨政使此道非改過從今  
日報章望瓊琚勿使音塵闕

再和答為之

林君維閩英數面成瓜葛鄰居接杖藜過飯厭疎糲讀  
書飽工夫論事極精核奮身君子場勇若怒未洩窮年  
栖旅巢由命非由拙王良驅八駿方駕度九折學堂疎  
雨餘石砌長苔髮弟子肥如瓠先生瘦唯骨

林君在朱  
氏講授朱



氏兒皆面白豐肥  
而林君如刻削

北門一都會塵埃人卒卒高蓋如秋

荷勢利相奔謁唯君尚寂寞來觀草玄筆斯文未易陳  
政當高閣束金馬事陸沈市門逐乾沒未須相賢愚聊  
自嘲迂濶憶昨戲贈詩迺辱報明月極知推挽意我車  
君欲轄屠龍真狂言奔馬不及舌賜書盈五車直舍方  
二墨會意便欣然餘事過窗日尚恐素餐錢諸生在城

關

次韻感春

張侯脫朝衣兒褐多純綠聞道無米舂煮术學辟穀官  
吏但索錢詔書哀惻獨東方長九尺不得侏儒祿屋中  
聲鵝雁日暮攪心曲窮巷無桃李緼袍非春服我吟白  
駒詩知君在空谷

茶如鷹爪拳湯作蟹眼煎時邀草玄客晴明坐南軒笑  
談非世故獨立萬物先春風引車馬隱隱何闐闐高蓋  
相摩戛騎奴爭道喧吾人撫榮觀宴處自超然城中百  
年木有鵲巢其顛鳴鳩來相宅日莫更謀遷

謝張泰伯惠黃雀鮓

去家十二年黃雀慳下筋笑開張侯盤湯餅始有助蜀

王煎藪法醢以羊彘兔

俗謂亥卯未醢鮓

麥餅薄於紙含漿和

醢酢秋霜落場穀一一挾團絮殘飛蒿艾間入網輒萬

數烹煎宜老稚翼缶煩愛護南包解京師至尊所珍御

玉盤登百十睥睨輕桂蠹五侯噉豢豹見謂美無度瀕

河飯食漿瓜蒞已佳茹誰言風沙中鄉味入供具坐令

親饌甘更使客得與蒲陰雖窮僻勉作三年住願公且

安樂分寄尚能屢

次韻無咎閩子常攜琴入村

士寒餓古猶今向來亦有子桑琴倚檻嘯歌非寫淫伯  
牙山高水深深萬世丘壘一知音閩君七絃抱幽獨晁  
子為之梁父吟天寒絡緯悲向壁秋高風露聲入林冷  
絲枯木拂蛛網十指乃能寫人心村村擊鼓如鳴鼉巨  
田見角穀成螺歲豐寒士亦把酒滿眼釘餽梨棗多晁  
家公子屢經過笑談與世殊白科文章落落映晁董詩

句往往妙陰何閻夫子勿謂知人難使琴抑怨久不和  
明光晝開九門肅不令高才牛下歌

同堯民游靈源廟廖獻臣置酒用馬陵二字賦詩

靈源廟前木我昔見拱把七年身屢到鬱鬱蔭蒼瓦春  
風響馬銜並轡客蕭酒更願少尹賢置酒意傾寫齋堂  
有佳處花柳輕姪姹蓮塘想舊葉稻畦識枯苴開關撫  
洪河黃流極天瀉憶昔武皇來繫壁沈白馬從官親土  
石襁負至鰥寡空餘瓠子詩哀怨逼騷雅白圭自聖禹

今誰定真假晁子發讜言聖功諒難亞排河著地中勢  
必千里下移民就寬閒何地不耕稼此論似太高吾亦  
茫取舍有器可深川吾未之學也

馬字

洪河壯觀游太府佳友朋春色挽我出東風如引繩昏  
昏版築氣王事始繁興大隄如連山小隄如岡陵增卑  
更培薄萬杵何登登憶昨河失道平原魚可嘗田萊人  
未復瘡大國方懲忽念耒耜間為民保丘塍百縣伐磬  
出夜半廢曲肱吾儕愧祿廩游行事鞍乘晁子漢公孫

新法司馬丞出幹大農部才術見嗟稱我坐廣文舍七  
年讀書燈結髮入場屋肯謂河難憑爾來觸事短癡甚  
霜前蠅世味極淡薄不了人愛憎唯得一卮酒尚能別  
淄澠所以對樽俎未曾問斗升酌我良已多狂言恐侵  
陵暮雲吞落日歸鳥求其朋

復用前韻

冷官僕馬瘦及門鼓

騰騰陵字

奉和王世弼寄上七兄先生用其韻

宮槐弄黃黃蓮葉綠婉婉時同二三友竹軒涼夏晚駕

言都城南以望征車返何知苦淹回及此秋景短愁思  
令人瘦舉目道路遠西風脫一葉薦士聞鄉選簡書催  
渡河賓客不得展親憂對萱叢婦病廢巾盥言趨厭次  
城鞭馬倦長阪棗林蔽天日交陰不容繖仰看實離離  
憶見花纂纂異鄉懷節物不共斟酒盞舉場下馬入深  
鏤嚴籥管諸生所程書捃束若稽稭蜜燈坐回環丹硯  
精料東披榛拔芝蘭斷石收琰琬紛爭一日事聲實溷  
端窺天球或弃遺斗筭尚何算西歸到官舍塵土昏案



板寒窗穿碧流潤礎開蒼蘚詩書鵲巢翻帷幔蛛絲罥  
果知兄未來光陰坐晚晚昨蒙叔父報亦歎音書簡薄  
言使事重激切被天遣逋流一方病責任媿和扁咨詢  
懷靡及不遑暇息偃嚼冰進糜殮衝雪踏層巘嚴霜八  
月飛貂狐無餘煖念嗟叔母劉窮年寄甥館尚憐公初  
黠誘掖到昭宛庭堅薄才資行又出畦町浮雲與世疎  
短綆及道淺匠伯首斲回大樗終偃蹇學宮尸廩入奉  
養闕豐腴學徒日新聞孤陋猶舊典小材渠因我持斲

問輪扁

復用此一韻  
事異似不害

大材我屈渠越雞當鵠卵未能引

分去戀祿幸苟免平生報一飽從事極黽勉豈如不見  
收放身就閒散思伯卧江南無心趣軒冕翁跡頗親  
黃蘗門屢款齋餘佛飯香茶沸甘露滿逢人問進退餘  
事寄一莞仲父挾高材甘為溝中斷青黃可犧樽薦廟  
配瑚璉季父有逸興未嘗入都輦臨流呼釣船拂石弄  
琴阮雍容從朋交林下追游行田園雖足樂及時思還  
返陰寒不鳴條望損倚門眼南枝喜鵲鳴尺素託黃犬

又以窀穸留歸期指姑洗寄聲問僧護兒髮可以縮妙  
言對賓客稱渠萬金產爾來弄筆硯墨水惡翻建大字  
如栖鴉已不作肥軟魯論未徹章政苦諸叔懶新詩開  
累紙欲罷不能卷遠懷託孤高別思盈繾綣秋月明夜  
潮柘漿凍金椀疎杵韻寒砧幽泉流翠筧吟哦口垂涎  
嚼味有餘雋傳示同好人我家東牀坦風煙意氣生揮  
毫寫藤蠶獵山窮鶉鴛罩海極蝦蜆銀鈎亂眼膜佳句  
濯肺腕且言伯在野朋友必推挽五泰列清廟聖緒今

皇績真儒運斗樞道化迪天顯朝論惜才難逸民大蒐  
獮豈聞任方物包貢遺羽籥招車必翹翹前席思蹇蹇  
王甥欲好懷高意恐難轉長篇題遠筒封寄淚空潛遙  
知雲際開灰飛黃鍾管

贈張仲謀

車如鷄栖馬如狗閉門常多出門少去天尺五張公子  
官居城南池館好健兒快馬紫遊韉迎我不知沙路長  
江榆老柳媚寒日枯荷小鴨凍野航津人刺船起應客

遙知故人一水隔下馬索酒呼三遲騎奴笑言客竟癡  
向來情義比瓜葛萬事略不置町畦追數存亡異憂樂  
燭如白虹貫酒卮開軒臨水弄長笛吹落殘月風淒淒  
城頭漏下四十刻破魔驚睡聽新詩君詩清壯悲節物  
政與秋蟲同一律爾來更覺苦語工思婦霜碓搗寒月  
朱顏綠髮深誤人不似草木長青春潔身好賢君自有  
今日相看進於舊以茲敢傾一杯酒為太夫人千歲壽

送薛樂道知鄖鄉

黃山葉縣連牆居謝公席上對擣菹雙鬟女弟如桃李  
蚤許歸我舍中雖平生同憂共安樂歲晚相望青雲衢  
去年樽酒輦轂下各喜身為反哺烏城頭歸烏尾畢逋  
春寒啄雪送行車解珮我無明月珠折柳下對千里駒  
念君胸中極了了作吏辦事猶詩書濁酒挽人作年少  
關防心地亦時須鄖鄉縣古民少訟但問自己不關渠  
登臨一笑雙白髮宜城凍笋供行厨人生此樂他事無  
行李道出漢南都寄聲諸謝今何如謝公書堂迷竹塢

手種竹今青青否我思謝公淚成雨屬公去漉穰下土  
送張沙河遊齊魯諸邦

張侯去沙河三食鄴下麥筆力望鼎董頗遭俗眼白平  
生學經綸胷中負奇畫未論功活人飽飯不常得妻寒  
尚賓敬兒餓猶筆墨側聞共伯城魚稻頗宜客又待塵  
生甌欲往立四壁平生貸米家十輩來薄責囊無孔方  
兄面有在陳色守株伺投兔歲晚將何獲廣道無人行  
春風轉沙石栖栖馬如狗去謁東侯伯布衣未可量蒼

髯身八尺魚乾要斗水士困易為德譬之舉大木人借  
一臂力諸公感意氣豈待故相識吾窮乏祖餞折柳當  
馬策

送吳彥歸番陽

學省困壅鹽人材任尊獎控伺祝螟蛉小大器冕旒諸  
生厭晚成躡學要僧馭摹書說偏旁破義析名象九鼎  
奏簫韶爰居端不饗青衿少到門庭除晝閒敞竹風交  
槐陰三見秋氣爽時賴解事人載酒直心賞吳郎楚國




材幽蘭秀榛莽彥國吐嘉言子將喜標榜平生欽豪俊  
久客慕鄉黨虛齋延洒掃薄飯薦脍鯢詩句唾成珠笑  
嘲愜爬痒春夏頻謝除曾未厭來往歸雁多喜聲寒蟬  
停哀響黃花滿籬落白蟻鬧甕盎留君待佳節忽忽戒  
徂兩親戚傷離居交遊念疇曩碁局無對曹擣菹失朋  
長問君去為何雲物愁莽蒼壽親髮斑斑千里勞夢想  
家雞藁頭肥寒魚受罾網甘旨款中厨伊啞弄文襦此  
行樂未央安知川塗廣深秋上滄江遠水平如掌人生

要得意杜士多曠蕩野鶴疲籠樊江鷗戀菰蔣本來丘  
壑姿不著芻豢養寄聲謝鄉鄰為我具兩漿有路即歸  
田君其信非誑



宋詩鈔卷二十八



總校官庶吉士臣張能照

校對官庶吉士臣陳墉

謄錄監生臣浦焯

欽定四庫全書薈要

集部

宋詩鈔卷二十九



詳校官候選知縣臣吳甸華

欽定四庫全書薈要卷二萬二百八十二

集部

宋詩鈔卷二十九

內閣中書舍人吳之振編

黃庭堅山谷集鈔下

薛樂道自南陽來入都留宿飲會作詩餞行

薛侯本貴胄射策一矢中金蘭託平生瓜葛比諸從數  
面尚成親况乃居連棟交遊及父子講學連伯仲奴人  
通使令孩稚接戲弄相憐負米勤同力采蘭供每持君

家書平安覩欵縫秦人與吾多憂樂一體共釋之廷尉  
曹微過成繫訟從此張長公不肯為時用丘阿無梧桐  
曲直不在鳳生涯谷口耕世事邯鄲夢自君抱憂端酒  
椀未忍覲高秋自南歸意氣稍寬縱黃花尚滿籬白蟻方  
浮甕私言助燕喜且莫戒輜重霜風獵帷幕銀燭吐蟬  
螗密坐幸頗歡劇飲寧辭痛疎鐘鳴曉撞小雨作寒霧  
廐馬蕭蕭鳴征人稍稍動九衢槐柳中縱緩青絲鞵朱  
樓豪士集紅袖清歌送河鯉獻鱸材江橙解包貢蟹擘

鵝子黃酒傾琥珀凍舉觴遙酌我發嚏知見頌行行鞭  
箠倦短句煩屢諷

次韻奉送公定

去年君渡河棗下實離離今年君渡河剝棗詠幽詩直  
緣思義重不憚鞍馬疲詩書半行李道路費歲時親交  
歎存沒學問訪闕遺我多後時悔君亦見事遲即此有  
真意定非兒女知虛名無用處北斗與南箕燕趙游俠  
子長安輕薄兒狂掉三寸舌躡登九級墀覆手雲雨翻



立談光陰移軟血盟父子指天出肝脾從來國器重見  
謂骨相奇築巖發夢寐獵渭非熊螭百工改繩墨一世擅  
文詞全人脰肩肩甕盎媼且宜大槐陰黃庭女蘿綿絡  
之昭陽兩兄弟還自如蛾眉工顰又宜笑百輩來茹咨  
班姬輕鴻毛更合衆口吹引繩痛排根蒙蔽枉成惟唯  
恐出已上殺之如奕棋塵埃百年琴絕絃為鍾期落落  
虎豹文義難管中窺至今揚子雲不與俗諧嬉歲晚草  
玄經覃思寫天維脫身天祿閣危於劍頭炊卧聞策董

賢閉門甘忍饑五侯盛賓客騶轡交橫馳時通問字人  
得酒未曾辭近者君家翁天與脫帶鞵已為冥冥鴻矰  
繳尚安施養蘭尋僧圃愛竹到水湄北闕免朝請西都分  
保釐文章九鼎重富貴一黍累趙良請灌園但為商君  
嗤弃甲尚文過兕多牛有皮出仕書掣肘歸來菊荒籬  
不為五斗折自無三徑資勝箭洗蹠血歸鞍懸月支斯  
人萬戶侯造物付鑪錘我觀史臣篇疏略記糟醅譬如  
官池蛙誰能問公私君懷明月珠簸弄滄海涯深房珮

芳蘭固是王所姬南貢尚包橘漢濱莫大隨每來促談  
塵風生塵竹枝骯髒得家法伊優不能為但聽呼擣捕  
便足解人頤功成在漏刻頴利處囊錐失勢落坑穽寒  
窻如愁鴟得馬折足禍亡羊多歧悲屢敵因心計伏兵  
幾面欺長戈仰關來吐欵受羈縻萬事只如此畢竟誰  
成虧愛君方寸間醇朴乃器師安得擺俗纏東岡並鋤  
犁由來在陰鶴不必振羽儀送行傾車蓋載酒滿鴟夷  
天高木葉落潦退河流卑屯雲塞六幕新月吐半規人

生會面難取醉聽狂癡語穿發欺笑

一作期笑

詩鋒犯嘲譏

懸知履霜來少別為不怡天津媚河漢闕角挂秋霓中  
有鬼與神赤舌弄陰機夜光但什襲出懷即瑕疵去去  
善逆旅凍醪約重持山藥倒藤架紅梨帶寒曦坐須騎  
奴還淹留歲恐期無為出門念牽衣嬰孺啼短韻願成  
頌時時寄相思

對酒歌答謝公靜

我為北海飲君作東武吟看君平生用意處蕭洒定自

知人心南陽城邊雪三日愁陰不能分皂白摧輪踈蹄  
泥數尺城門晝閉眠賈客移人僵尸在旦夕誰能忍長  
待食麥身憂天下自有人寒士何者愁填臆民生政自  
不願材可乘以車可鞭策君不見海南水沉紫旃檀碎  
身百鍊金博山豈如不蒙斧斤賞老大絕崖霜雪間投  
身有用禍所集何況四達之衢井先汲昨日青童天上  
回手捧玉帝除書來一番通籍清都闕百身書名赤城  
臺飛昇度世無虛日怪我短褐趨塵埃顧謂彼童子此

何預人事但對清樽即眼開一杯引入著勝地傳聞官  
酒亦自清徑須沽取續吾瓶南山朝來似有意今夜倘  
放春月明

戲贈彥深

李原字彥深厚  
之弟居南陽

李髯家徒立四壁未嘗一飯能留客春寒茆屋交相風  
倚牆捫蝨讀書策老妻甘貧能養姑寧剪髮鬢不典書  
大兒得殮不索魚小兒得袴不索襦庾郎鮭菜二十七  
太常齋日三百餘上丁分膳一飽飯藏神夢訴羊蹴蔬

世傳寒士有食籍一生當飯百甕菹冥冥主張審如此

附郭小圃宜勤鉏葱秧青青葵甲綠早韭晚菘羹糝熟  
充虛解戰賴湯餅芼以苜蓿與甘菊幾日憐槐已著花  
一心呪筭莫成竹羣兒笑髯窮百巧我謂勝人飯重肉  
羣兒笑髯不若人我獨愛髯無事貧君不見猛虎即人  
厭麋鹿人還寢皮食其肉濡需終與豕俱焦飫肥擇甘  
果非福蟲蟻無知不足驚橫目之民萬物靈請食熊蹯  
楚千乘立死山壁漢公卿李髯作人有佳處李髯作詩

有佳句雖無厚祿故人書門外猶多長者車我讀揚雄  
逐貧賦斯人用意未全疎

寄南陽謝外舅

謝公遂偃蹇南陽無舊廬天與解纓紱元非傲當塗庖  
丁釋牛刀衆手斫大觚白雲曲肱卧青山滿床書妙質  
落川澤果然天網疎然知一作今人巧未覺古人迂築

場歲功休夜泉鳴竹渠曾懷鬱磊砢此物諒時須兒能  
了翁事安用府中趨孫能誦翁詩乃是千里駒人生行



樂耳用舍要自如我方神其拙社櫟官道樗公猶憂斧  
斤睥睨斲樽壺萬古身後前芭蕉秋雨餘少年喜狡獪  
叱化粒成珠謨功可歌舞學古則媛姝所好果不同未  
可一理驅眇忠忘言對安得南飛鳧鄙心生蔓草萌芽  
望耘鉏離筵如昨日春柳見霜枯未辱錦繡段時蒙雙  
鯉魚憶在參几杖雍容覩規模引接開藻鑒高明通事  
樞門生五七輩寂寞半白鬚談經落塵尾行樂從藍輿  
看竹辟疆宅閱士黃公壚雪屋煮茶藥晴簷張畫圖幽

寺促燈火青檀置搏捕遶床叫一擲十白九雉盧蔡澤  
來分功袁耽必上都開旗縱七走破竹殄羣俘成臬燭  
為明挾長朋佐呼終飲見溫克所爭匪錙銖誰令運甓  
翁見謂牧猪奴事託丈人重乃愛屋上烏舊言如對面  
形迹滯舟車風簾想隱几天籟鳴寒梧尚喜讀書否還  
能把酒無鄴城渺塵沙冠蓋若秋蕖相過問寒溫意氣  
馳九衢楚客雖工瑟齊人本好竽永懷溟海量北斗不  
可斟勝夜親筆墨因來明月珠

和謝公定征南謠

傳聞交州初陸梁東連五溪西氏羌軍行不斷蠻標盾  
謀主皆收漢畔亡合浦譙門腥血沸晉興城下白骨荒  
謀臣異時坐致寇守臣今日愧包桑已遣戈船下灘水  
更分樓船浮豫章頗聞師出三鴟路盡是中屯六郡良  
漢南食麥如食玉湖南驅人如驅羊營平請穀三百萬  
初連引兵九千里少府私錢不可知大農計歲今餘幾  
土兵番馬貔虎同蝮虵毒草篁竹中未論芻粟捐金費

直愁瘴癘連營空我思荊州李太守欲募蠻夷令自攻  
至今民歌尹殺我州郡擇人誠見功張喬祝良不難得  
誰借前筋開天聰詔書哀痛言語切為民一洗橫尸血  
推鋒陷堅賞萬戶塹山堙谷窮三穴南平舊時頗臣順  
欲獻封疆請旄節廟謀猶計病中原豈知一朝更屠滅  
天道從來不爭勝功臣好為可喜說交州雞肋安足貪  
漢開九郡勞臣監呂嘉不肯佩銀印徵側持戈敵百男  
君不見往年瀕海未郡縣趙佗閉關罷朝獻老翁竊帝

聊自娛白頭抱孫思事漢孝文親遣勞苦書稽首請去  
黃屋車得一亡十終不忍太宗之仁千古無

寄題欽之草堂

河南有伏流經營太行根盛德不終晦發為清濟源公  
家濟源上太行正當門脩竹帶藩籬百禽鳴朝暾仰視  
浮雲作俯窺流水奔相望有盤谷李愿故居存主人國  
之老實惟商巖孫班行昔供奉屢進逆耳言天子色為  
動羣公聲亦吞肅肅冰霜際不改白玉溫出處士所重

其微難共論公勿懷草堂朝廷待公尊

和答梅子明王揚休點密雲龍

小壁雲龍不入香元豐龍焙承詔作二月嘗新官字蓋  
游絲不到延春閣去年曾缺減光輝人間十九人未知

外家春官小宗伯分送蓬山栽半壁建安甕椀鷓鴣斑  
谷簾水與月共色五除試湯飲墨客泛甌銀粟無水脉  
辟宮邂逅王廣文初觀團團破龍紋諸公自別淄澠了  
兔月葵花不足論石磴春芽風雪落煮澆肺渴初不惡

河伯來觀東海若鹿逢朱雲真折角子真雲孫唾成珠  
廟堂只今用諸儒鍊成五石補天手上書致身可亨衢  
顧我賜茶無骨相他年幸公宥相餉

次韻子瞻春菜

北方春蔬嚼冰雪妍暎思采南山蕨菲苗水餅姑置之  
苦菜黃雞羹糝滑蓴絲色紫菰首白萋蒿牙甜焯頭辣  
生菹入湯翻手成芼以薑橙誇縷抹驚雷菌子出萬釘  
白鵝截掌鼈解甲琅玕林深未飄籜軟炊香杭煨短茁

萬錢自是宰相事一飯且從吾黨說公如端為苦筭歸  
明日青衫誠可脫

次韻答堯民

君開蘇公詩疾讀思過半譬如聞韶耳三月忘味歎我  
詩豈其朋組麗等俳玩不聞南風絃同調廣陵散鶴鳴  
九天上官作家雞伴晁子但愛我品藻私月旦官閒樂  
相從梨栗供杯案門靜鳥雀嬉花深蜂蝶亂忽蒙加禮  
貌齋戒事搢盥門大心更小意督辭反緩君材於用多



舞選弓矢貫聰明回自照勝已果非悞我如相繪事素  
質施朽炭古來得道人非獨大庭館晁子已不疑冬寒  
春自暖繫表知藥言擇友得荀粲

再和寄子瞻聞得湖州

天下無相知得一已當半桃僵李為仆芝焚蕙增歎佳  
人在江湖照影自娛玩一朝入漢宮掃除備冗散何如  
終流落長作朝雲伴相思欲面論坐起雞五旦身慚尸  
廩祿有罪未見案公又雄萬夫皦皦不自亂臧穀皆亡

羊要以道湔盥傳聲向東南王事不可緩春波下數州  
快若七札貫椎鼓張風帆相見激衰悞空文不傳心千  
古付煨炭安得垂天雲飛就吳興館魚饜柳絮肥筍煮  
溪沙暖解歌使君詞樽前有三粲

答王道濟寺丞觀許道寧山水圖

往逢醉許在長安蠻溪大硯磨松烟忽呼絹素翻硯水  
久不下筆或經年異時踏門闖白首巾冠欵斜更索酒  
舉杯意氣欲翻盆倒卧虛樽將八九醉拈枯筆墨淋浪

勢若山崩不停手數尺江山萬里遙滿堂風物冷蕭蕭

山僧歸寺童子後漁伯欲渡行人招先君笑指溪上宅

鷓鴣白鷺如相識許生再拜謝不能元是天機非筆力

自言年少眼明時手揮八幅錦江絲贈行卷送張京兆

心知李成是我師張公身逐銘旌去流落不知今主誰

大梁畫肆閱水墨我君盤礴忘揖客蛛絲煤尾意昏昏

幾年風動人家壁雨雪涔涔滿寺庭四圍冷落讓丹青

笑誚肆翁十萬錢卷付騎奴市盡傾王丞來觀皆失席

指點如見初畫日四時風物入句圖信知君家有摩詰  
我持此圖二十年眼見綠髮皆華顛許生縮手入黃泉  
衆史弄筆摩青天君家枯松出老翟風煙枯枝倚崩石  
蠹穿風物君愛惜不誣方將有人識

### 過家

絡緯聲轉急田車寒不運兒時手種柳上與雲雨近舍  
傍舊傭保少換老欲盡宰木鬱蒼蒼田園變畦畛招延  
屈父黨勞問走婚親歸來翻作客顧影良自哂一生萍

託水萬事雪侵鬢夜闌風隕霜乾葉落成陣燈花何故  
喜大是報書信親年當喜懼兒齒欲毀亂繫船三百里  
去夢無一寸

食笋十韻

洛下斑竹笋花時壓鮭菜一束酬千金掉頭不肯賣我  
來白下聚此族富庖宰蠶粟戴地翻殼鯨觸牆壞鱗鱗  
入中厨如償食竹債甘菹和菌耳辛膳脯薑芥烹鵝雞  
股掌魚鼈亂羣介小兒哇不美鼠壤有餘嘬可貴生於

少古來食共噫尚想高將軍五溪無人采

蕭巽葛敏修二學子和予食筍詩次韻答之

北饌厭羊酪南庖豐筍菜自北初落南幾為兒所賣習  
知價廉平百態事烹宰鹽晞枯腊瘦蜜漬真味壞就根  
煨茁美豈念炮烙債咀吞千畝餘胷次不薑芥二妙各  
能詩才名動江介詩論多佳句膾炙甘我嚼因君思養  
竹萬籟聽秋噫從此繕藩籬下令禁漁采

一作下書  
示漁采

韭黃照春盤菰白媚秋菜惟此蒼竹苗市上三時賣江

南家家竹剪伐誰主宰半以苦見疎不言甘易壞葛陂  
雕龍睡未索兒孫債獺膽能分杯虎魄妙拾芥此物於  
食穀如客得儉介思入帝鼎烹忍遭饑涎嘍懶林供翰  
墨礎杵風號噫每下歎枯株焚如落樵采

答永新宗令寄石耳

饑欲食首山薇渴欲飲潁川水嘉禾令尹清如水寄我  
南山石上耳筠籠動浮烟雨姿淪湯磨沙光陸離竹萌  
粉餌相發揮芥薑作辛和味宜公庭退食飽下筋杞菊避

席遺萍蓋雁門天花不復憶況乃桑鵝與楮雞小人蔡  
羹亦易足嘉蔬遣餉荷眷私吾聞石耳之生常在蒼崖  
之絕壁苔衣石腴風日炙捫蘿挽葛採萬仞仄足委骨  
豺虎宅佩刀買犢劍買牛作民父母今得職閔仲叔不  
以口腹累安邑我其敢用鮭菜煩嘉禾願公不復甘此  
鼎免使射利登嵯峨

彫陂

彫陂之水清且泚屈為印文三百里呼船載過七十餘



褰裳亂流初不記竹輿嘔啞山徑涼僕姑呼婦聲相倚  
篁中猶道泥滑滑僕夫慘慘耕夫喜窮山為吏如漫郎  
安能為人作嗃矢老僧迎謁喜我來吾以王事篤行李  
知民虛實應縣官我寧信目不信耳僧言生長八十餘  
縣令未曾身到此

長句謝陳適用惠送吳南雄所贈紙

廬陵政事無全牛恐是漢時陳太丘書記姓名不肖學  
得紙無異夏得裘琢詩包紙送贈我自狀明月非暗投

詩句縱橫剪宮錦惜無阿買書銀鈎蠻溪切藤卷盈百  
側釐羞滑蠶羞白想當鳴杵砧面平枕柳葉風溪水碧  
千里鵝毛意不輕瘴衣腥膩北歸客君侯謙虛不自供  
胡不贈世文章伯一涪之水容牛蹄識字有數我自知  
小時雙鈎學楷法至今兒子憎家雞雖然嘉惠敢虛辱  
煮泥續尾成大軸寫心與君心莫傳平生落魄不問天  
樽前花底幸好戲為君絕筆謝風烟已無商頌猗那手  
請續南華內外篇

上大蒙籠

乙卯  
晨起

黃霧冥冥小石門苔衣草路無人迹苦竹參天大石門  
虎迹兔蹊聊倚息陰風搜林山鬼嘯千丈寒藤遶崩石  
清風源裏有人家牛羊在山亦桑麻向來陸梁慢官府  
試呼使前問其故衣冠漢儀民父子吏曹擾之至如此  
窮鄉有米無食鹽今日有田無米食但願官清不愛錢  
長養兒孫聽驅使

勞坑入前城

乙卯  
飯後

刀坑石如刀勞坑人馬勞窈窕篁竹陰是常主逋逃白  
狐跳梁去豪猪森怒嗥黃雲覺日瘦木落知風飈輕軒  
息源口飯羹煮溪毛山農驚長吏出拜家騷騷借問淡  
食民祖孫甘舖糟賴官得鹽喫政苦無錢刀

乙卯宿清泉寺

稅輿陟高岡却立倚天壁就輿亂清溪轉石飛霹靂十  
步一沮洳五步一枳棘上方未言返豁見平土宅田家  
雞犬歸佛廟檀欒碧蓮蕩落紅衣泉泓數白石人如安

巢鳥稍就一枝息鐘魚各知時吾亦自得力

丙辰仍宿清泉寺

山農居負山呼集來苦遲既來授政役謠詠謂余欺按  
省其家資可忍鞭扶之恩言諭公家疑阻久迺隨滕口  
終自愧吾敢乏王師官寧憚淹留職在拊嫠嫠所將部  
曲多溷汝父老為西山失半壁且復下囊輜啼鴉散篇帙  
休吏稅中衣石泉鼓坎坎竹風吹參差書冷行熠燿壁  
蟲催杼機昏缸夜未央高枕夢登巖

已未過太湖僧寺得宗汝為書寄山蘋白酒長韻

詩寄答

從學晚聞道謀官無見功  
早衰觀水鹽內熱愧鄰邦  
北鄰有宗侯治劇乃雍容  
摩手撫鰥寡藁礫強梁桃李  
與荆棘稱物施露霜政經甚  
鎮密私不蚍蜉通吏舍無  
請賕家有侯在堂府符下鹽  
策縣官勸和羹作民敏風  
雨令先諸邑行我居萬夫  
上闡情世無雙此邑宅巖巖  
里中頗秦風翁媪無恙時  
出分如蜂房一錢氣不直白

挺及父兄簪筆懷三尺揖我謂我臧向來豪傑吏治之  
以牛羊我不忍敵民教養如兒甥荆雞伏鵠卵久望羽  
翼成訟端洶洶來諭去稍聽從尚餘租庸調歲歲稽法  
程按圖索家資四壁達牖窓揜目鞭扑之桁楊相推棖  
身欲免官去駑馬戀豆糠所以積廩鹽未使戶得烹八  
月醜社酒公私樂年登遣徒與會稽而悉走荻篁吾惟  
不足遣夙駕略我疆邑西軼戾地是嘗嬰吾鋒齟齬其  
強宗彼乃可使令夙夜于遠郊草露沾帷裳入磴履虎

尾捫蘿觸蠱芒借問夕何宿煙邊數峰橫松竹不見天  
蟠空作秋聲谷鳥與溪瀨合絃琵琶箏稅駕亂石間巖  
寺鳴疎鐘山農頗來服見其父孫翁苦辭王賦遲戶戶  
無積藏民病我亦病呻吟達五更韻為誦書語

一作書  
空語

行歌類楚狂舉鞭問嘉禾秣馬可及城惜哉憂城旦不  
得對榻床洒筆付飛鳥北風吹報章書回銀鈎壯句與  
麝煤香浮蛆撥官醅傾壺嫩鵝黃山氣常翁盃此物可  
屢觴預藥割紫藤開籠喜手封味溫頗宜人芼以石飴



薑舉杯引藥糜詠詩對寒江寄聲甚勞苦相思秋月明  
我邑萬戶鄉其民資囂凶欲割以壽公使之承化光反  
以來壽我中有吞舟鯨銅墨俱王命職思慰孤惇何時  
賄一擲燒燭呪明瓊

庚申宿觀音院

谷底一墟落地形如盎盆椽題相照耀其民頗家溫土  
風甚於秦不可借釜甌僧屋無陶瓦剪茅蒼竹樊借問  
僧安在乞飯走諸門人閑鳥鳥語簾涼風水文旁有蜂

蜜廬頗聞衙集喧將雨蟻爭丘麇兵復追奔紅英委鳳  
翼赤幘我雞冠汲烹寒泉窟伐燭古松根相戒莫浪出  
月黑虎夔藩

金刀坑迎將家待追漿坑十餘戶山農不至因題  
其壁

窮鄉阻地險篁竹嘯夔魑惡少擅三窟不承吏追呼老  
翁燕無凶偃蹇坐里閭後生習聞見官不禁權輿懷書  
斥長吏持杖麇公徒遂令五百里化為豺豕墟古來沈

牛羊檄水臣鯉魚猛虎剝文章矧而民髮膚哀哉奉其  
身曾不如鳥鳥破家縣令手南面天子除要能伐強梁  
然後活惇孤屬為民父母未教忍先誅山川甚秀拔人  
物亦詩書十室有忠信此鄉何獨無

代書

阿熊去我時秋暑削甘瓜離別日日除蓮房倒箭鞞得  
書報平安肥字如栖鴉汝才躍鑪金自必為鑊鉞窮年  
抱新書挽條咀春葩弄筆不能休屈宋欲作衙屈指推

日星許身上雲霞安知九天闕虎豹守夜叉祝田操豚  
蹄持狹所欲奢文章六經來汗漫十牛車譬如觀滄海  
細大極龍蝦古人以聖學未宥廢百家蓋山木十圍齋  
堂綠陰遮紅稻香盂飯黃雞厭食鮭摩挲垂便腹頗復  
讀書耶念汝齒壯矣無婦助烹茶父兄亦憐汝須兒牧  
犬猴且伐千章材贈行當馬搗羸糧果後時定隨八月  
槎覺民在中林丁丁聞兔置奉身甚和友幹父辦咄嗟  
臺源吟松瀨先生岸巾紗留客醉風月槃筋供柔嘉仍

工朱絲絃洗心拂奇邪孤臣發楚調傾國怨胡笳把筆  
學周鼓字形錐畫沙詩書乃甫好不為蓬生麻元明祖師  
禪妙手發琵琶已無富貴心鼓吹一池蛙天民服農圃  
頗復秋斂賒下田督未耘入嶺按新畬悉力輸王賦至  
今困生涯知命叔山徒爐香巖佛花唯思苾芻園脫冠  
著袈裟起家望兩季佩金跼朝鞞嘉魚在南國宗廟薦  
鱠鯊我為萬夫長朝論不齒牙刺頭簿領中蚤蝨廢搔  
爬世界已纏縛官箴易疵瑕何時煙雨裏驅羊入金華

遣奴迫王事不暇學驚蛇

學一作草

寄陳適用

日月如驚鴻歸燕不及社清明氣妍暖疊疊向朱夏輕  
衣頗宜人裘褐就椀架已非紅紫時春事歸桑柘空餘  
車馬跡顛倒桃李下新晴百鳥語各自有匹亞林中僕  
姑歸苦遭拙婦罵氣候使之然光陰促晨夜解甲號清  
風卽有幽蟲化朱墨本非工王事少閒暇幸蒙餘波及  
治郡得黃霸邑鄰陳太丘威德可資借決事不遲疑敏

手擘泰華頗復集紅衣呼僚飲休假歌梁韻金石舞地  
委蘭麝寄我五字詩句法窺鮑謝亦嘆薄領勞行欲問  
田舍相期黃公壚不異秦人炙我初無廊廟身願執耕  
稼今將荷鋤歸區芋畦甘蔗觀君氣如虹千輩可陵跨  
自當出懷璧往取連城價賜地買歌童珠翠羅廣廈富  
貴不相忘寄聲相慰藉

讀方言

八月梨棗紅繞牆風自落江南風雨餘未覺衣衾薄壁

蟲憂寒來催婦織衣去聲著荒畦杞菊花猶用充羹臙連

日無酒飲令人風味惡頗似揚子雲家貧官落魄忽聞  
輜軒書澁讀勞輔齟虛堂漏刻間九土可領略願多載  
酒人喜我識字博設心更自笑欲過屠門嚼往時抱經  
綸待價一丘壑卜師非熊羆夢相解靡索所欲吾未奢  
儻使耕可穫今年美年麥厨饌豐餅拓摩菽腹中書安  
知非糟粕

送彥孚主簿



斯文當兩都江夏世無雙叔度初不言漢庭望風降中  
間眇人物潛伏老崆峒本朝開典禮棧樸作株椿世父  
盛文藻如陸海潘江三戰士皆北轅弓錦韜扛白衣受  
傳詔短命終螢窓夢升卧南陽耆舊無兩龐空鏡歐陽  
銘松風悲隴瀧四海羣從間邇來頗瑋淙主簿吾宗秀  
其能任為邦軀幹雖眇小勇沉鼎可扛擇師別陳許取  
友觀昇逢折腰佐髯令邑訟銷吠老時邀府中飲下箔  
蠟燒缸紅裳笑千金清夜酒百缸同僚有惡少嘲謔語

亂嗔君但隱几笑諸老歎敦龐況乃工朱墨氣和信甚  
矻持此應時須十年擁麾幢相逢常鞅掌衙鼓趨蓬蓬  
簿書敗清談汗顏吏縱縱臨分何以贈要我賦蘭茱黃  
華雖衆笑白雪不同腔野人甘芹味敢饋厭羊羶顧余  
百短拙飽腹慙膾肱維思解官去一丘事耕稼君當取  
富貴鐘鼓羅擊撞伏藏鼪鼯徑猶想足音跬

和曹子方雜言

正月尾垂雲如覆孟雁作斜行書三十六陂浸煙水想

對西江彭蠡湖人言春色濃如酒不見插秧吳女手冷

卿小塢頗藏春張侯官居柳對門當風橫笛留三弄燒

燭圍棋覆九軍盡是向來行樂事每見琵琶憶朝雲只

今不舉蛾眉酒紅牙捍撥網蛛塵曹侯束書丞太僕試

說相馬猶可人照夜白真乘黃萬馬同秣隨低昂一矢

射落阜鵬雙張侯猶思在戎行橫山虎北開漢疆冷卿

智多髮蒼浪牛刀發礪思一邦政成十綴舞紅粧兩侯

不如曹子方朶頤論詩蝟毛張龜藏六用中有光何時

端能俱過我掃除北寺讀書堂  
菊苗煮餅深注湯更碾  
盤龍不入香

戲贈曹子方家鳳兒

凍芽入湯獅子吼  
荔子新剝女兒頰  
鳳郎但喜風土樂  
不解生愁山疊疊  
目如點漆射清揚  
歸時定自能文章  
莫隨閩嶺三年語  
轉却中原萬籟簧

送張材翁赴秦簽

金沙醱醱春縱橫  
提壺粟留催酒行  
公家諸父酌我醉

橫笛送晚延月明此時諸兒皆秀發酒間乞書藤紙滑  
北門相見後十年醉語十不省七八吏事袞袞談趙張  
乃是樽前綠髮郎風悲松丘忽三歲更覺綠竹能風霜  
去作將軍幕下士猶聞防秋屯虎兕只今陛下思保民  
所要邊頭不生事短長不登四萬日愚智相去三十里  
百分舉酒更若為千戶封侯僕來爾

奉謝劉景文送團茶

劉侯惠我大玄璧上有雌雄雙鳳跡鵝溪水練落春雪

粟面一杯增目力，劉侯惠我小玄壁。自裁半壁煮瓊糜，  
收藏殘月惜未碾。直待阿衡來說詩，絳囊團團餘幾壁。  
因來送我公莫惜，箇中渴羌飽湯餅。雞蘇胡麻煮同喫，  
謝景文惠浩然所作廷珪墨

廷珪麝墨出蘇家，麝煤漆澤紋烏鞞。柳枝瘦龍印香字，  
十襲一日三摩挲。劉侯愛我如桃李，揮贈要我書萬紙。  
不意神禹治水圭，忽然入我懷袖裏。吾不能手抄五車  
書，亦不能寫論付官奴。便當閉門學水墨，灑作江南驟

雨圖

題落星寺

落星開士深結屋龍閣老翁來賦詩

寺僧擇隆作宴坐小軒為落星之勝

處

小雨藏山客坐久長江接天帆到遲宴寢清香與世

隔畫圖妙絕

一作絕筆

無人知

僧隆畫甚富而寒山拾得畫最妙

蜂房各自

開戶牖處處煮茶藤一枝

過致政屯田劉公隱廬

兒時拜公床眼碧眉紫煙舍前架茅茨爐香坐僧禪女

奴煮罌粟石盆瀉機泉今來掃門巷竹間翁蛻蟬堂堂  
列五老勝氣失江山石盆爛黃土茅齋薪壞椽女奴為  
民妻又瘞蒿里園當年笑語地華屋轉朱欄課兒種松  
子傘蓋上參天投策數去日木行天再環先生古人風  
鐵膽石肺肝眼前不可意壯日挂其冠解衣廬君峰洗  
耳瀑布源霧豹藏文章驚世時一斑衆人初易之久遠  
乃見難憶昔子政在為翁數解顏五兵森武庫河漢落  
舌端王陽已富貴塵冠不肖彈呻吟刊十史凡例墨新



乾宰木忽拱把相望風隧寒百楹書萬卷少子似翁賢

上參一

作高參

貴池

池人祀昭明為郭西九郎時新覆大舟水死十二人以為神之威也

橫雲初抹漆爛漫南紀黑不見九華峰如與親友隔憶  
當秋景明九老對几席何曾閉蓬窓卧聽寒雨滴不食  
貴池魚喜尋昭明宅筆硯鼠行塵芝菌生銅鬲思成佳  
句夢貽我錦數尺屬者浪吞舟風電更附益老翁哭婦  
兒相將難再得存亡如日月薄蝕行道失流俗暗本原

謂神吐其食神理儻有私丘禱久以默

庚寅乙未猶泊大雷口

廣原嗥終風發怒土囊口萬艘萍無根迺知積水厚龍  
鱗火熒熒鞭笞雷霆走公私連檣休森如束春韭倚筇  
蒹葭灣垂楊欲生肘雄文酬江山惜無韓與柳五言呻  
吟內慚愧陶謝手送菜煩鄰船買魚熟溪友兒童報晦  
冥正晝見箕斗吾方廢書眠鼻鼾鞞囊吼猶防盜窺家  
嚴鼓申夜守冶城謝公墩牛渚蕩子婦何時快登臨篙

師分牛酒

乙未移舟出口

畏風濤復入遂宿馬同行有劉三班善射沙夾遇盜劉手殺三人

江湖吞天胸蛟龍垂涎口養軀無千金特為親故厚本  
心非華軒而與馬爭走聘婦緝落毛教兒耨葱韭衣食  
端須幾將老猶掣肘安能詭隨人曲折作杞柳桓公甕  
盜瘦楚國不龜手生涯但如此那問託婚友久陰快夜  
晴天文若科斗村南鬼火寒村北風虎吼野人驅雞豚  
縛絡堅纏守劉郎弓石八猛氣壓馮婦一試金僕姑歸

飲軟臂酒

阻水泊舟竹山下

竹山蟲鳥朋友語討論陰晴怕風雨丁寧相教防禍機  
草動塵驚忽飛去提壺歸去意甚真柳暗花濃亦半春  
北風幾日銅官縣欲過五松無主人

次韻伯氏長蘆寺下

風從落帆休天與大江平僧坊晝亦淨鐘磬寒逾清淹  
留屬暇日植杖數連甍頗與幽子逢煮茗當酒傾攜手

霜木末朱欄見潮生檣移永正縣鳥度建康城薪者得  
樹雞羹孟味南烹香杭炊白玉飽飯愧閒行叢祠思歸  
樂吟弄夕陽明思歸誠獨樂薇蕨漸春榮

贈別李端叔

我觀江南山如目不受垢憶食江南薇子獨於我厚在  
北思江山如懷冰雪顏千峰上雲雨岑絕何由攀當時  
喜文章各有兒子氣爾來頷須白有兒能拜起讀書浩  
湖海解意開春冰成山更崇堀顧我醜丘陵白玉著石

中與物太落落涇渭相將流世不名清濁乞言旣不易  
贈言良獨難古來得道人挂舌屋壁間牧羊金華道載  
酒太玄宅支頤聽晤語願君喙三尺我行風雨夜船窓  
聞遠雞故人不可見故人心可知

曉放汴舟

秋聲滿山河行李在梁宋川塗事雞鳴身亦逐羣動霜  
清魚下流橘柚入包貢又持三十口去作江南夢

發舒州向皖口道中作寄李德叟

黑雲平屋簷

一作崔嵬  
雲壓空

晨夜隔星月曉裝商旅前冰底

泥活活野人攘畔耕

一作侵  
畔耕

蹇馬不能滑駝裘惜蒙茸

俱落水塘缺孤村小蝸舍乞火乾履韉前登極崢嶸一作

高寒他日飛鳥沒寒花委亂草耐凍鳴風葉

一作耐凍風  
葉間梅含零

亂發江形篆平沙分派回勁筆髯弟不俱來得句漫剗剗

一作漫得  
句奇崛

却望同安城唯有松鬱鬱遙知浦口晴諸峰

見明雪

一作  
松雪

徐孺子祠堂

喬木幽人三畝宅生芻一束向誰論  
藤蘿得意干雲日  
簫鼓何心進酒樽  
白屋可能無孺子  
黃堂不是欠陳蕃  
古人冷淡今人笑  
湖水年年到舊痕

池口風雨留三日

孤城三日風吹雨  
小市人家只菜蔬  
水遠山長雙屬玉  
身閒心苦一春鉏  
翁從旁舍來收網  
我適臨淵不羨魚  
俛仰之間已陳迹  
莫窓歸了讀殘書

思親汝州作



歲晚寒侵遊子衣，  
拘留幕府報官移。  
五更歸夢三千里，  
一日思親十二時。  
車上吐茵元不逐，  
市中有虎竟成疑。  
秋毫得失關何事，  
摠為平安書到遲。

衝雪宿新寨忽忽不樂

縣北縣南何日了，  
又來新寨解征鞍。  
山衝斗柄三星沒，  
雪共月明千里寒。  
小吏忽一作有時須束帶，  
故人頗問不

休官江南長盡梢，  
雲竹歸及春風斬釣竿。

郭明父作西齋于頰尾請予賦詩

食貧自以官為業聞說西齋意凜然萬卷藏書宜子弟  
十年種木長風煙未嘗終日不思頽想見先生多好賢  
安得雍容一樽酒女郎臺下水如天

戲詠江南土風

十月江南未得霜高林殘水下寒塘飯香獵戶分熊白  
酒熟漁家擘蟹黃橘摘金苞隨驛使禾舂玉粒送官倉  
踏歌夜結田神社游女多隨陌上郎

和答孫不愚見贈

詩比淮南似小山酒名麴米出雲安且憑詩酒勤春事  
莫愛兒郎作好官簿領侵尋台相筆風埃蓬勃使星鞍  
小臣才力堪為掾敢學前人便挂冠

次韻襄仲謀同年

交蓋春風汝水邊客床相對卧僧壇舞陽去葉纔百里  
賤子與公俱少年白髮齊生如有種青山好去坐無錢  
煙沙篁竹江南岸輸與鷓鴣取次眠

稚川約晚過進叔次前韻贈稚川并呈進叔

人騎一馬鈍如蛙行向城東小隱家道上風埃迷皁白  
堂前水竹湛清華我歸河曲定寒食公到江南應削瓜  
樽酒光陰俱可惜端須連夜發園花

同世弼韻作寄伯氏在濟南兼呈六舅祠部學士  
山光掃黛水接藍聞說樽前愜笑談伯氏清修如舅氏  
濟南蕭灑似江南屢陪風月乾吟筆不解笙簧醉舞衫  
只恐使君乘傳去拾遺今日是前銜

次韻蓋郎中率郭郎中休官二首

仕路風波雙白髮閒曹笑傲兩詩流故人相見自青眼  
新貴即今多黑頭桃葉柳花明曉市荻芽蒲笋上春洲  
定知聞健休官去酒戶家園得自由

郭文時御道中野服過親壺飯頗為

分臺御史所

訶故有此句

世態已更千變盡心源不受一塵侵

一作險阻艱難親得力是非憂樂飽

心經青春白日無公事紫燕黃鸝俱好音付與兒孫知伏

臘聽教魚鳥逐飛沉黃公壚下曾知味定是逃禪入少

林

和張沙河招飲

張侯耕稼不逢年過午未炊兒女煎腹裏雖盈五車讀  
囊中能有幾錢穿況聞緼素尚黃葛可怕雪花鋪白羶  
誰料丹徒布衣侶今朝忽有酒如川

次韻答柳通叟求田問舍之詩

少日心期轉繆悠蛾眉見妬且障羞但令有婦如康子  
安用生兒似仲謀橫笛牛羊歸晚徑捲簾瓜芋熟西疇  
功名可致猶回首何況功名不可求

謝送宣城筆

宣城變樣蹲

一作尊

雞距諸葛名家將

一作將

鼠鬚一束喜

從公處得千金求買市中無漫投墨客摹科斗勝與朱  
門飽蠹魚愧我初非草玄手不將閒寫吏文書

和陳君儀讀太真外傳三首

扶風喬木夏陰合斜谷鈴聲秋夜深人到愁來無處會  
不關情處揔傷心

梁州一曲當時事

一作問  
元夢

記得曾拈玉笛吹端正樓空

春晝永小桃猶學淡燕支

高麗條脫瑠紅玉

一作一雙條  
脫玻璃玉

邏迤琵琶撚綠絲

一作  
三尺

琵琶綠  
繭絲

蛛網屋煤昏故物

一作脂  
澤歌

此生唯有夢來時

### 楊朴墓

三尺孤墳一布衣人言無復似當時千秋萬歲還來此

月笛煙莎世不知

楊朴喜吹笛嘗  
作莎詩極工

### 戲和舍弟船場探春二首

雨餘禽語催天曉月上梨花放夜闌莫聽遊人待妍暖



十分傾酒對春寒

百舌解啼泥滑滑忽成風  
雨落花天城南一段春如錦  
喚取詩人到酒邊

次韻寅菴四首

四時說盡菴前事寄遠如開水墨圖  
略有生涯如谷口  
非無卜肆在成都旁籬榛栗供賓客  
滿眼雲山奉宴居  
閒與老農歌帝力年豐村落罷追胥

兄作新菴接舊居一原風物萃庭隅  
陸機招隱方傳洛

張翰思歸正在吳五斗折腰慚僕妾幾年合眼夢鄉閭  
白雲行處應垂淚黃犬歸時早寄書

大若塘邊獨網魚小桃源口帶經鉏詩催孺子成雞柵  
茶約鄰翁掘芋區苦棟狂風寒徹骨黃梅細雨潤如酥  
此時睡到日三丈自起開關招酒徒

未怪窮山寂寞居此情常與世情疎誰家生計無閒地  
大半歸來已白須不用看雲眠永日會思臨水寄雙魚  
公私逋負田園薄未至妨人作樂無

呻吟齋睡起二首

斐几坐清晝博山凝妙香  
蘭牙依客土柳色過鄰牆  
巷僻過從少官閒氣味長  
江南一枕夢高卧聽鳴榔

牆下蓬蒿地兒童課剪除  
蔓萑隨分種杞菊未須鉏  
河水傳烽火交州報捷書  
無能落閒處慙愧飽春蔬

和師厚郊居示里中諸君

籬邊黃菊關心事窗外青山不世情  
江橘千頭供歲計秋蛙一部洗朝醒  
歸鴻往燕競時節宿草新墳多友生

身後功名空自重眼前樽酒未宜輕

次韻外舅謝師厚喜王正仲三丈奉詔相南兵回  
至襄陽捨驛馬就舟見過三首

漢上思見龐德公別來悲歎事無窮聲名籍甚漫前日  
須鬢索然成老翁家醪已隨刻漏下園花更開三四紅  
相逢不飲未為得聽取百鳥啼怱怱

能來問疾好音傳蹇步昏花當日痊烹鯉得書增目力  
呼兒扶立候門前游談取重慙犀首居物多蠹昧計然

唯有交親等金石白頭忘義復忘年

語言少味無阿堵冷

一作冰

雪相看有此君燈火詩書如

夢寐麒麟圖畫屬浮雲平章息女能為婦歡喜兒曹解  
綴文憂樂同科惟石友別離空復數朝曛

夜發分寧寄杜澗叟

陽關一曲水東流燈火旌陽一釣舟我自只如常日醉  
滿川風月替人愁

次韻胡彥明同年羈旅京師寄李子飛三章一章

道其困窮二章勸之歸三章言我亦欲歸耳胡  
李相甥也故有檳榔之句

看除日月坐中銓一歲應無官九遷  
惹韭盈盤市門食  
詩書滿枕客牀羶留連節物孤朋酒惱亂鄰翁謁子錢  
誰料丹徒布衣侶困窮且忍試新年

丁未同升鄉里賢別離寒暑未推遷  
蕭條羈旅深窮巷  
蚤晚聲名上細氈碧嶂清江元有宅  
白魚黃雀不論錢  
檳榔一解何須得李氏弟兄佳少年

畏人重祿難堪忍閱世浮雲易變遷徐步當車饑當肉  
鉏頭為枕草為氈元無馬上封侯骨安用人間使鬼錢  
不是朱門爭底事清溪白石可忘年

上蕭家峽

玉笥峰前幾百家山明松雪水明沙  
起虛人集春蔬好

桑菌竹萌煙蕨芽

晚年本云起虛人在烟  
中語荷蓀歸來有蕨芽

出迎使客質明放船自瓦窑歸

鼓吹喧江雨不開丹楓落葉放船回  
風行水上如雲過

地近嶺南無雁來樓閣人家捲簾幕菰蒲鷗鳥樂灣洄  
惜無陶謝揮斤手詩句縱橫付酒杯

登快閣

癡兒了却公家事快閣東西倚晚晴落木千山天遠大  
澄江一道月分明朱絃已為佳人絕青眼聊因美酒橫  
萬里歸船弄長笛此心吾與白鷗盟

題安福李令朝華亭

丹楹刻桷上崢嶸表裏江山路眼平曉日成霞張錦綺



青林多露綴珠纓人如旋磨觀羣蟻田似圍碁據一枰  
對案昏昏迷簿領暫來登覽見高明

寄舒申之戶曹

吉州司戶官雖小曾屈詩人杜審言今日宣城讀書客  
還趨手板傍轅門江山依舊歲時改桃李欲開煙雨昏  
公退但呼紅袖飲剩傳歌曲教新翻

奕碁一首呈任公漸

偶無公事客休時席上談兵校

一作角

兩碁心似蛛絲遊

碧落身如蜩甲化枯枝湘東一目誠甘死天下中分尚  
可持誰為吾徒猶愛日參橫月落不曾知

奉答李和甫代簡二絕句

山色江聲相與清卷簾待得月華生可憐一曲並船笛  
說盡故人離別情

夢中往事隨心見醉裏繁華亂眼生長為風流惱人病  
不如天性總無情

次韻君庸寓慈雲寺待韶惠錢不至

主簿看梅落雪中  
閨人應賦首飛蓬  
問安兒女音書少  
破笑壺觴夢寐同  
馬祖峰前青未了  
鬱孤臺下水如空  
江山信美思歸去  
聽我勞歌亦欲東

奉同公擇作揀芽詠

赤囊歲上雙龍壁

囊貢小團亦單壘  
唯揀芽則雙壘

曾見前朝盛事來

想得天香隨御所  
延春閣道轉輕雷

元豐末作  
延春閣

元明題哥羅驛竹枝詞

尺五攀天天慘顏  
鹽煙溪瘴鎖諸蠻  
平生夢亦未嘗處

聞有鴉飛不到山  
風黑馬跑驢瘦  
嶺日黃人度鬼門關  
黔南去此無多遠  
想在夕陽猿嘯間

長沙留別

折脚鐺中同淡粥  
曲腰桑下把離杯  
知君不是南遷客  
魑魅無情須早回

元明留別

枕椰筍白映玉箸  
椰子酒清宜具觴  
市井衣裘半冬夏  
陰晴朝暮變炎涼  
莫推月色共千里  
不寄江南書一行

無賴笳聲上雲漢曉來偏繞九迴腸

宿山家效孟浩然

秋陽沉山西委照藩落下霧連雲氣平濛濛翳中野空  
村晚無人一二小蝸舍老翁止客宿喬木磨我馬松爐  
依佈煙檣竹照清夜幽泉抱除鳴生涯渺蕭灑翁家炊  
黃梁殺雞延食罷問余所從誰庸詎學丘也投身解世  
紛耻問老農稼予生久逼回百累未一謝斑斑吾親髮  
弟妹逼婚嫁無以供甘旨何緣敢閒暇安得釋此懸相

從老桑柘

漫尉

并序戊戌為  
葉縣尉時作

庭堅讀漫叟文愛其不從於役而人性物理齎然詣  
於根理因戲作漫尉一篇簡舞陽尉裴仲謨兼寄贈  
郝希孟胡深夫二同年為我相與和而張之尚使來  
者知居厚為寡悔之府然知我罪我皆在此詩

豫章黃魯直既拙又狂癡往在江湖南漁樵乃其師腰  
斧入白雲揮車棹清溪虎豹不亂行鷗鳥相與嬉遇人

不崖異順物無瑕疵不知愛故厭不悔為人欺晨朝常  
漫出莫夜亦漫歸漫尉葉公城漫撫病餘黎不篡非已  
事不趨非吾時人罵狂癡拙魯直更喜之或請陳漫尉  
壽尉蒲萄卮酒行激懦氣攘袂起哨規君子守一官烏  
有苟簡為奈何如秋葭信狂風離披漫行恐汗德漫止  
將敗機漫默買猜謗漫言來詬譏漫尉謝答客願客深  
長思漫行無軌躅漫止無馬鞿漫默怨者寡漫言知者  
希吾生漫叟後不券與之齊於戲獨如子因使目為眉

強顏不計返乾坤一醯雞崑崙視糟垤既化不自知悔  
吝雖萬塗直道甚坦夷覆轍索孤竹奔車求仲尼以旌  
招虞人賤者不肖尸玉潤安可涸日光安可緇斯言出  
繫表當以罔象窺賦分有自然那用時世移吾漫誠難  
改盡醉不敢辭

按田

井序

余與晁端國斯道奉檄按馬鞍山東濬河稻田陂官  
丁誤引道左次水澤山深徑危泥濘堅冰長幹挾馬



僅可以度行五十里遂不容馬步沮洳虎迹新往來  
烏鳥叢噪荆榛盡日出入乃至河上集近山之農告  
以獻利者皆以為瀕水為舍居旁治新田果蓏有畦  
桑棗成行自山之東西皆不可為陂港河源出四頭  
山支分為三其一盡南出少折而東入舞陽其一稍  
西流又折而北入石塘河其一港河也出山而東流卒  
與二水合而入汝河汝河今漕河也吾二人既臨河  
具知獻利者之狀而余獨有感焉頃歲肉食者以西

羌為憂師老西鄙而士大夫知與不知爭道孫吳覆  
軍殺將以致邊境幾無寧日而富貴者今日比肩近  
者朝言多在民事欲化西北之麥隴皆為東南之稻  
田良吏攘臂起郡有召信臣縣有史起矣夫土性者  
自先王所不能齊而一切不問蓐夫故苗灌為新田  
茫茫水陂丘壘平盡其君子威以法刑其小人毒以  
鞭扑有舉斯有功有功斯有賞作者之議曰前日吏  
持印相授以媮眼前而厚利弃於蒼煙野草之間是

豈不可笑以余觀之恐是非特未定也觀朝廷之意  
初不責必成奉承者要必有功遂失之耳語曰事傳  
三人輒失其真詩曰周爰咨謀蓋使指也今也咨謀  
者不慘怛以告者未忠信歟夫聽言之道必以事觀  
之奪民之故習而強以所未嘗其利安在興利者受  
實賞力田者受實弊郡縣行空文朝廷收虛名名為利  
民其實害之議者謂之有意於民乎吾不知也以為  
有功於民乎今既若是矣予既有是言思道屢歎而

已是日所至已遠不能歸遂宿水濱民家北風黃  
草破屋見星月與晁五引酒相酌忽然已醉不知跋  
涉之勞也綴以詩強思道和之

河冰積崢嶸山雪晴索寞幽齋怯寒威況復出城郭馬  
為蝟毛縮人歎狐裘薄淤泥虎跡交叢社烏聲樂橋經  
野燒斷崖值天風落洩雲迷鴻濛戴石瘦犖嶮攀緣若  
登天扶服如入橐窮幽至河麋落日更槃礴新民數十  
家飄寓初棲託壯產無情農荒榛盡開鑿臨流遣官丁

悉使呼老弱，恩言諭官意。鄣水陂可作，春秧百頃秔。秋  
報千倉穫，掉頭笑應儂。吾麥自不惡，麥苗不為稻。誠恐  
非民瘼，不知肉食者。何必苦改作，我行疲鞍馬。且用休  
羈絡，艱難相顧歎。共道折腰錯，勢窮不得已。來自取束  
縛，月明夜蕭蕭。解衣寬帶索，卧看雲行天。北斗挂屋角，  
析薪爨酒鼎。興至且相酌。

將歸葉先寄明復季常

初日照屋山，好鳥弄簷角。卷簾吏却掃，齋舍寒蕭索。呼

兒笏春醪期與夫子酌簡書驅我出衝雪凍兩脚莫行  
星輝輝曉起雞喔喔青煙過空村商旅無遠索豈不欲  
少留王事苦敦薄平生白眼人今日折腰諾可憐五斗  
米奪我一溪樂公等何逍遙睥睨寄講學談犀振清風  
碁局落秋電雲陰愁濛鴻山路險犖确慎無告歸軒使  
我數日惡羸駢逆歸心旋凜蹶霜灑悲嘶惜鄣泥短箠  
冷難促南征喜氣動迎面蛛絲落買網鱸金橙歸償炊  
黍約

新寨餞南歸

初更月蝕缺半壁三更北風雪平屋夜寒置酒送歸客  
長歌燕雁燈前落故園無書已十月目極千里雲水隔  
客方有行乃未已歸且經予江上宅比鄰諸老應相問  
為道於今不如昔新知翻手覆手間故人江南與江北  
有時日高天氣清炙背南軒把書策可憐斯人巧言語  
今已埋沒黃土陌乃知生前傾意氣不用身後書竹帛  
往在江南最少年萬事過眼如鳥翼夜行南山看射虎

失脚墜入崖底黑却攀荆棘上平田何曾悔念身可惜  
辭家上馬不反顧談笑據鞍似無敵邇來多病足憂虞平  
地進寸退數尺意氣索然成老翁所有髣髮猶未白閒  
居為婦執薪爨宿處野人爭卧席昔壯今衰殆不如吾  
恐未必不為福寄聲諸老善自愛客行努力更強食門  
前種柳今幾長戒兒勿令打鷓鴣不晚歸來躑躅間為  
公置酒臨江閣

曉起臨汝



缺月欲崢嶸鳴雞有期信征人催風駕客夢未渠盡野  
荒多斷橋河凍無裂豐羸馬踏冰翻疑狐觸林適清風  
蕩初日喬木轉幽韻崧高忽在眼岌峩臨數郡玄雲默  
垂空意有萬里潤寒暗不成雨卷懷就膚寸觀象思古  
人動靜配天運物來斯一時無得乃至順涼暄但循環  
用舍誰喜愠安得忘言者與講齊物論

戲贈陳季張

氣清語不凡郭與陳季優季子有美質明月懸高秋詞

談貫百家炙轂出膏油放聲寄大塊肆情無去留方圓  
付自爾規矩為瘡疣當其說荒唐衆口莫能咻書案鼠  
篆塵銜蔬滿床頭居不省家舍那問犬馬牛吾嘗觀聖  
人與世為獻酬道通衆人行智欲萬物周微言觀季子  
頗亦有意不季子捧腹笑吾豈搢紳囚我將乘扶搖南  
與大鵬遊相羊九萬里厭則下滄州黃子失所答如耕  
不能耰井蛙延海螿樂事擅一丘束牲盟伯夷固自取  
擲揄無心以觸物愛子如虛舟維楫苟不存傾覆當誰

尤尚思濟來者非但自為謀

即席

落葉不勝掃月明樹陰疎親鄰二三子樽酒相與俱霜  
栗剝寒橐晚菘煮青蔬解官方就門敦薄無簡書純益  
氣蕭蕭未羈天馬駒元禮喜作詩豪氣小未除大薛知  
力學日來反三隅小薛受善言如以柳貫魚天民嘗逸  
駕近稍就樞株知命雖畸人清談頗有餘阿盧快犢子  
規矩尚小殊不材於用少我則澗底樗會合只偶然等

閒異秦吳人生一世間何異樂出虛過耳莫省領披懷  
使恢疎買網尚可鱸倒壺更遣沽不當愛一醉倒倩路  
人扶

和舍弟中秋月

高秋搖落四十五清都早霜凋桂叢纖塵不隔四維淨  
寒光獨照萬象中少年氣與節物競詩豪酒聖難爭鋒  
桓伊老驥思千里尚能三弄當清風廣文陋儒懶於事  
浩歌不眠倚梧桐百憂生火作內熱何時心與此月同

後生晚出不勉學從漢至今無揚雄天馬權竒大宛種  
吾家阿熊風骨聳言詩已出靈運前行身未聞孟軻勇  
明窓文字不取讀蜘蛛結網塵堆壅少壯幾時夏已秋  
待而成人吾木拱憐汝起予秋月篇我衰安得筆如椽  
但使樽中常有酒不辭坐上更無羶把詩問字為汝說  
便當侯家歌舞筵

秋懷二首

秋陰細細壓茅堂吟蟲啾啾昨夜涼雨開芭蕉新間舊

風撼簷簷宮應商砧聲已急不可緩  
簷景既短難為長  
孤表斷縫棄墻角豈念晏歲多繁霜

茅堂索索秋風發行繞空庭  
紫苔滑蛙號池上晚來雨  
鵲轉南枝夜深月翻手覆手不可期  
一死一生交道絕  
湖水無端浸白雲故人書斷孤鴻沒

四月末天氣陡然如秋  
遂御袂衣游北沙亭觀江  
漲

沙岸人家報急流  
船官解纜正夷猶  
震雷將雨度絕壑

遠水粘天吞釣舟甚欲去揮白羽箠可堪更着紫茸裘  
平生得意無人會浩蕩春鉏且自由

何造誠作浩然堂陳義甚高然頗喜度世飛昇之  
術築屋飯方士願乘六氣遊天間故作浩然詞  
以贈之

萬物浮沉共我家清明心水徧河沙無鈎狂象聽人語  
露地白牛看月斜小雨呼兒莛桃李疎簾幃客轉琵琶  
塵塵三昧開門戶不用丹田養素霞

答余洪範

懸磬齋厨數米炊  
貧中氣味更相思  
可無昨日黃花酒  
又是春風柳絮時

次韻任道食荔支有感

一錢不直程衛尉  
萬事稱好司馬公  
白髮永無懷橘日  
六年怊悵荔支紅

韓信

為黃幾  
復作

韓生高材跨一世  
劉項存亡翻手耳  
終然不忍負沛公



頗似從容得天意成臯日夜望救兵取齊自重身已輕  
躡足封王能早寤豈恨淮陰食千戶雖知天下有所歸  
獨憐身與噲等齊蒯通狂說不足撼陳豨孺子胡能為  
子嘗貫酒淮陰市韓信廟前木十圍千年事與浮雲去  
想見留侯決是非丈夫出身佐明主用舍行藏可自知  
功名邂逅軒天地萬事當觀失意時

以右軍書數種贈丘十四

丘郎氣如春景晴風暄百菓草木生眼如霜鶻齒玉冰

擁書環坐愛窓明  
松花泛硯摹真行  
字身藏穎秀勁清  
問誰學之果蘭亭  
我昔頗復戲墨卿  
銀鈎蠆尾爛箱籬  
贈君鋪案黏曲屏  
小字莫作癡凍蠅  
樂毅論勝遺教經  
大字無過瘞鶴銘  
官奴作草欺伯英  
隨人作計終後人  
自成一家始逼真  
鄉家小女名阿潛  
眉目似翁有精神  
試留此書他日學  
往往不減衛夫人

贈別幾復

風驚鹿散豫章城  
邂逅相逢食楚苹  
佳友在門忘燕寢

故人發藥見平生只今滿坐且樽酒後夜此堂還月明  
契濶愁思已知處西山影落莫江清

趙令許載酒見過

玉馬何時破紫苔南溪水滿綠徘徊買魚斫鱠須論網  
撲杏供盤不數枚廣漢威名知訟少平原樽俎費詩催  
草玄寂寂下簾幙稍得閑時公合來

和答趙令同前韻

人生政自無閒暇忙裏偷閒得幾回紫燕黃鸝驅日月

朱櫻紅杏落條枚詩成稍覺嘉賓集飲少先愁急板催  
親遣小童鉏草徑鳴騶早晚出城來

趙令答詩約攜山妓見訪

晴波鷓鴣漾潭隈能使遊人判不回風入園林寒漠漠  
日移宮殿影枚枚未嘗綠蟻何妨撥宿戒紅粧莫待催  
缺月西南光景少仍須挽

一作  
提

取燭籠來

春近四絕句

閨後陽和臘裏回濛濛小雨暗樓臺柳條榆莢弄顏色

便恐入簾雙燕來

亭臺經雨壓塵沙  
春近登臨意氣佳  
更喜輕寒勒成雪  
未春先放一城花

小雪晴沙不作泥  
疎簾紅日弄朝暉  
年華已伴梅梢晚  
春色先從草際歸

梅英欲盡香無賴  
草色才蘇綠未勻  
苦竹空將歲寒節  
又隨官柳到青春

迎醇甫夫婦

陳甥歸約柳青初

一作飲  
屠蘇

麥隴纖纖忽可鉏望子從來

非一日因人略不寄雙魚園中鳥語勸沽酒窓下日長

宜讀書策馬得行休更秣

一作遠嫁蕭  
咸親髮白

已令童稚割生

芻

一作平安行  
李莫徐徐

登南禪寺懷裴仲謀

茅亭風入葛衣輕坐見山河表裏清歸燕畧無三月事  
殘蟬猶占一枝鳴天高秋樹葉公邑日暮碧雲樊相城  
別後寄詩能慰我似逃空谷聽人聲

夏日夢伯兄寄江南

故園相見畧雍容  
睡起南窓日射紅

一作相攜猶聽隔溪春睡起開書見

手封詩酒一年談笑隔江山  
千里夢魂通河天  
月暈魚分

子榭葉風微鹿養茸幾度  
白沙青影裏審聽嘶馬自堵

筇

一作白髮倚門愁絕處  
處可堪衣斷去時縫

同孫不愚過昆陽

田園恰恰值春忙  
驅馬悠悠昆水陽  
古廟藤蘿穿戶牖  
斷碑風雨碎文章  
真人寂寞神為社  
堅壘委蛇女採桑

拂帽村帘誇酒好為君聊解一瓢嘗

今昆陽有水俗號  
灰河圖經乃以為

壞河予考之皆不然正在昆陽城南恐  
是昆水地理志言昆水出南僮是乎

### 題雙鳧觀

飄蕭閱世等虛舟

一作人世  
若虛舟

歎息眼前無此流滿地悲

風盤翠竹半叢寒日破紅榴青山空在衣冠古

一作不  
逐市朝

改白鶴不歸

一作  
歸來

宮殿秋王令平生樽酒地千年萬歲

想來遊

雪中連日行役戲書簡同僚



簡書催出似驅雞聞道饑寒滿屋啼  
炙背宵眠楫柱火嚼冰晨飯薩波  
壑風如利劍穿狐腋雪似流沙飲馬蹄  
官小責輕聊自慰猶勝擐甲去征西

客自潭府來稱明因寺僧作靜照堂求予作

客從潭府渡河梁籍甚傳誇靜照堂  
正苦窮年對塵土坐令合眼夢湖湘  
市門曉日魚蝦白隣舍秋風橘柚黃  
去馬來舟爭歲月老僧元不下胡床

道中寄景珍兼簡庾元鎮

傳語濠州賢刺史隔年詩債幾時還因循樽俎疎相見  
弃擲光陰只等閒心在青雲故人處身行紅雨亂花間  
遙知別後多狂醉惱殺江南庾子山


喜念四念八至京

朔雪蕭蕭映薄幃夢回空覺淚痕稀驚聞庭樹烏烏樂  
知我江湖鴻雁歸拂榻喜開姜季被上堂先著老萊衣  
酒樽煙火長相近酬勸從今更不違

講武臺南有感

月明猶在搭衣竿  
曉踏臺南路  
屈盤騶子雨中先馬去  
村童烟外倚牆看  
鴉啼宰木秋風急  
鷺立漁船野水乾  
花似去年堪折贈  
插花人去淚闌干

宋詩鈔卷二十九



總校官庶吉士臣張能照  
校對官庶吉士臣陳墉  
謄錄監生臣浦焞

財團  
法人

佛陀教育基金會

釋淨空